

四庫全書

經部

# 欽定四庫全書

經部

讀禮通考卷三十一至

詳校官監察御史臣劉湄

給事中臣溫常綬覆勘

總校官編修臣王燕緒

校對官中書臣高申

謄錄監生臣王宮

欽定四庫全書

讀禮通考卷三十一

刑部尚書徐乾學撰

喪服二

衰裳

儀禮喪服記凡衰外削幅裳內削幅幅三衽

注削猶殺也大古冠

布衣布先知為上外殺其幅以便體也後知為下內殺其幅稍有所飾也後世聖人易之以此為喪服衽者謂辟兩側空中中央也凡裳前三幅後四幅也疏自此已下盡祛尺二寸記衰裳之制用衽多少尺寸之數凡者總五服而言外削幅者謂縫之邊幅向內外內削幅者謂縫之邊幅向內幅三衽者據裳而言為裳之法前三幅後

四幅幅皆三辟攝之以其七幅布幅二尺二寸幅皆兩  
畔各去一寸為削幅則二十七十四丈四尺若不辟積其  
要中則束身不得就故須辟積要中也到中廣狹任人  
麤細故衲之辟攝亦不言寸數多少但幅別以三為限  
爾衲衲兩側空中央者衲是屈中之稱一幅凡三處屈  
之辟兩邊相著自然中央空矣裳前三幅後四幅者前  
為陽後為陰  
象陰陽也

教繼公曰凡衲謂凡名衲者也衲外削幅者所以別  
於吉服之制亦如喪冠外畢之類裳不變者衣裳同  
用衣重而裳輕變其重者以  
示異足矣故裳不必變也

若齊裳內衲外

注齊緝也凡五服之衲一斬四緝緝裳者內展之緝衲者外展之疏裳內衲

外者上言衲外削幅此齊還向外展之上言裳內削幅此齊還向內展之先言裳者凡齊據下裳而緝之裳在

下故先言也一斬四緝者謂齊衰至緦麻並齊  
齊則有針功緦之名雖沒去齊名而齊可知也

教繼公曰裳內衰外與其削幅之意同亦以  
齊衰別於吉也凡齊主於裳也故先言之

負廣出於適寸

注負在背上者也適辟領也負出於辟  
領外旁一寸疏以一方布置於背上

上畔縫著領下畔垂放之以在背上故得  
負名出於辟領外旁一寸總尺八寸也

教繼公曰負之廣無定數唯以出於  
適旁一寸為度也其長蓋比於衰與

適博四寸出於衰

注博廣也辟領廣四寸則與闕中八  
寸也兩之為尺六寸也出於衰者旁

出衰不著寸數者可知也疏此辟領廣四寸據兩廂  
而言兩相向外各廣四寸不著寸數可知者以衰廣四  
寸辟領橫廣總尺六寸除中央四寸當衰表  
外兩旁各出衰六寸故云不著寸數可知也

教繼公曰適辟領之布旁出者也云博四寸又云出於袞則出於袞者非謂其博也然則博者其從之廣與凡為衣必先開當項之處其上下之度相去四寸左右之度則隨其人之肥瘠而為之闊狹不定也凡言衣皆方翦之所謂方領是也此凶服亦方領其異者則但翦其上下之相去四寸者而不殊其左右之布使連於衣而各出於肩上之兩旁以為適所謂適博四寸也以其橫之闊狹不定故不著其出於袞之寸數唯言出於袞而已

王延相曰辟領向外謂之適左右各廣四寸反摺向外即今之開肩窩餘布不縫於領中而著之於外也袞博四寸當心辟領左右各四寸則當中闊八寸矣皆反摺向外則出於袞外左右各六寸矣

袞長六寸博四寸

注廣袞當心也前有袞後有負版疏右有辟領孝子袞祇無所不在

綴於外衿之上故得廣長當心哀戚無所不在者以衰之言摧孝子有哀摧之志也負者荷負其悲哀在背也適者以人子哀戚之情專適於父母不兼念餘事也是其四處皆有悲痛無所不在也

教繼公曰五服之屬及錫與疑皆以衰為名則是凡山服予服無不有此衰矣其辟領亦當同之若負版則唯孝子乃有之故記先言之也

# 衣帶下尺

注衣帶下尺者要也廣尺足以掩裳上際也疏謂衣要也衣即衰也帶謂帶衣之帶非

大帶革帶也下尺者據上下闊一尺若橫不著尺寸者人有粗細取定為限也足以掩裳上際者若無要則衣與裳交際之間露見表衣有要則不露見也言上際者對兩旁有衽掩旁兩廂下際也

教繼公曰此接衣之布其廣亦無常度唯以去帶一尺為準豈亦以人有長短之不齊故與帶謂要經也

絞帶布帶  
亦存焉

王廷相曰後儒因鄭賈之說遂於衣下施要取布半幅橫綴於身下謂之衣帶其謬妄無據不成法制殊為可鄙近世四明黃氏潤玉五衣圖論曰經謂衣帶下尺者言人隨身長短於束帶下再長一尺可掩裳際也今解之曰此蓋舉上衣之度而言也人身有長短不可繫以尺寸計之止於束帶之處其下仍長一尺為度爾非如此不足以掩裳際黃氏之論得之也

郝敬曰衣即袞帶大帶凡禮服吉凶皆有帶衣長出帶下尺使不見裳要也

衽二尺有五寸

注衽所以掩裳際也上正一尺燕尾二尺五寸凡用布三尺五寸疏掩裳際

者對上要而言此掩裳兩廂下際不合處也上正一尺者取布三尺五寸廣一幅留上一尺為正正者正方不



破之也一尺之下從一畔旁入六寸乃邪向下一畔一尺五寸去下畔亦六寸橫斷之留下一尺為正如是則用布三尺五寸得兩條衽衽各二尺五寸兩條共用布三尺五寸也然後兩旁皆綴於衣垂之向下掩裳際此謂男子之服婦人則無以婦人之服連衣裳無帶下又無衽也

王廷相曰注疏謬誤之大莫甚於此近世丘氏有云注疏有綴衽於外衽之上之文既曰有外衽則必有內衽矣今之衽衣之制止有身衣而繫帶於兩旁如世俗所謂對衽衣者衣著之際遂使衽不當心殊失古制今擬綴繫帶四條以外衽掩於內衽之上則具服之際衽正當心矣丘氏雖有是論然不知以衽施於衿下續於衣正幅之旁雖欲以外衽掩內然領止於領下安得斜掩於脇亦不通之論也惟四明黃氏論云衽二尺五寸言用布一幅長二尺五寸斜尖裁為燕尾狀施於領下作內外衽乃為得之蓋衣必有

衿而後可以掩其胃體若如鄭賈之說是衣皆無衿如對衿比甲之制矣當心正中其膚體必是暴露豈事理之順通聖人制衣之善哉今案戴記問喪曰親始死扱上衽若在裳之兩旁要謂之上大記曰小斂大斂祭服不倒皆左衽論語曰被髮左衽謂左掩其衿也若在裳之兩旁謂之左衽何居許氏說文曰衽衿交也若在裳之兩旁安有交義今解之曰衾領當如二襍相交衣身承領不盡別用布二尺五寸交斜裁之綴於衣身之旁以承領挾頭皆向上廣頭皆向下以一為上衽以一為下衽黃氏所謂領下施衽是也

黃宗義曰鄭賈之說取布三尺五寸上下各留一尺一尺之外上於左旁裁入六寸下於右旁裁入六寸便於盡處相望斜裁如是則用布三尺五寸得兩條衽各長二尺五寸廣頭向上狹頭向下綴於衣兩旁

狀如燕尾以掩裳旁際此與深衣之曲裾制雖異而其義則同蓋以深衣之裳一旁連一旁不連故曲裾兩條重沓而掩於一旁喪服前後不連故衽分綴於兩旁也夫既同是一物不應在彼為鈎邊在此為衽知彼曲裾之非則知此衽之制未為得矣且衣既對衽則前綴之袷不能居下鄭所謂廣袤當心者亦自抵牾矣今用布二尺五寸交斜裁之為二狹頭向上廣頭向上下辟領五寸綴於衣身之旁上以承領下與衣齊在左者為外衽在右者為內衽此定制也喪服之制唯黃潤玉為得之

袂屬幅

注屬猶連也連幅謂不削疏屬幅者謂整幅二尺二寸凡用布為衣皆去邊幅一寸為縫殺

今此屬連其幅則不削去其邊幅取整幅為袂也必不削幅者欲與衣二尺二寸同縱橫二尺二寸正方也教繼公曰袂屬幅而不削是繅合之也古者衣袂皆屬幅乃著之者嫌凶服之制或異於吉也此袂之長

短蓋如深衣之袂  
亦反屈之及肘

衣二尺有二寸

注衣自領至要二尺二寸倍之四尺四寸  
疏衣二尺二寸者衣身有前後今

且據一廂而言總前  
後計之為四尺四寸

王廷相曰此言衣者自袂之本及衣身而言也大凡  
布幅二尺二寸故在衣身得二尺二寸屬幅又二尺  
二寸共長四尺四寸也周尺十寸只有漢尺八寸布  
幅四尺得三尺二寸四寸又得三寸二分是一袂之  
廣共該今尺三尺五寸二分矣布幅中度狹廣如此  
亦足以反屈及肘矣使布幅少狹別以布而續之如  
三尺五寸二分之  
長亦無不可焉

祛尺二寸

注祛袖口也尺二寸足以容中人之併兩手  
吉時拱尚左手喪時拱尚右手  
疏尺二寸

者據複攝而言圍之則二尺四寸與深衣之袪同

杜佑曰周制凡五服在上曰袷在下曰裳袷縫外殺裳縫內殺經云凡袷外削幅裳內削幅鄭玄云削猶殺也外殺其幅以便體也內殺其幅稍有飾也身長二尺二寸合前後為四尺四寸兩邊凡八尺八寸經云衣二尺有二寸鄭玄云衣自領至要二尺有二寸是也鄭亦以此為袷中之數則袷亦正方二尺二寸也以古布幅廣二尺二寸禮記所云端袷謂此也繼袷之末又綴以廣尺二寸布謂之袪經云袪尺二寸馬融云袪末也尺二寸足以容拱手也喪拱尚右手又衣下施要取半幅橫綴身下長短隨衣經云衣帶下尺鄭云謂要也廣尺足以掩裳上際又於要兩旁當縫各綴一袪經云袪二尺有五寸鄭云袪所以掩裳際其制上正方一尺一尺之下角斜向下長尺五寸末頭闊六寸今但取三尺五寸布交解相沓裁之即可

亦謂之燕尾令闊頭向上取象與吉服之衽相反又取布方尺八寸著背上上縫著領下垂之謂之負經云負廣出於通寸鄭云負在背上也通辟領也負出於辟領外旁一寸也今據辟領廣尺六寸負各出一寸故知尺八寸其開領處左右各闊四寸向外辟展之謂之通經云通博四寸出於衺鄭云通辟領廣四寸則兩闊八寸也兩之為尺六寸又取布長六寸博四寸綴於衣外衿上謂之衺經云衺長六寸博四寸鄭云廣衺當心也負左右有辟領孝子衺戚無不在其衺之制前三幅後四幅開兩邊故以衽蔽之於要上每一幅為三辟積其辟積相向為之謂之衽其衽大小隨人要粗細為之經云衺內削幅幅三衽鄭云衽謂辟兩側空中中央也凡衺前三幅後四幅案稱幅不必全幅蓋中破為之故禮記深衣篇云制十有二幅以應十二月是六幅交解之也若斬衺即衺與衺不繼緝若齊衺以下衺則外緝之衺則內緝之謂之

齊經云若齊裳內衰外鄭云齊緝也凡五服之衰一新四緝緝裳者內展之緝衰者外展之展則緋緋也案喪服本文甚難曉悟歷代著述悉皆手寫本經今先言其制次引經文所冀後學易為詳覽

陳祥道曰衰博四寸當心辟領博四寸出於衰則綴於兩肅各去衰二寸以其去衰二寸并辟領四寸與衰四寸此所謂與闊中八寸兩之為尺六寸也辟領及闊中尺六寸負出於辟領外旁一寸則負廣尺八寸矣廣尺八寸而長稱之則辟領之長蓋與衰齊衰用三升布則負與辟領之布亦三升

教繼公曰此袂廣二尺二寸而袂尺二寸亦謂圓殺一尺如深衣之袂也此衣與袂袂帶下之度吉服亦然特於此見之爾

萬斯同曰案袂尺二寸者謂於二尺二寸之袂縫其下一尺而其上一尺二寸不縫也故袂謂之袖口乃

通典謂繼袂之末又綴以廣尺二寸之布則失之遠矣

喪服傳斬衰衰三升

注八十縷為升升字當為登登成也疏不言裳者裳與衰同故舉

衰以見裳為君義服衰三升半不言者舉正以包義也

檀弓衰與其不當物也寧無衰

注惡其亂禮不當物謂精麤廣狹不無法制

疏此語通於五服衰以表情制有法度若精麤不應廣狹乖法便為失禮雖有不如無也

陸佃曰物若周書所謂朝服八十物七十物是已據此布之精粗非獨升數不同縷數亦不同矣尊者服

精卑者服粗

馬蹄孟曰衰不當物則亂先王之制而後世疑其傳無衰則禮雖不行而其制度定於一猶可以識之故



曰寧  
無衰

黃軫曰左傳載晉平公有卿佐之喪而奏樂飲燕膳夫屠蒯入諫曰服以將禮禮以行事事有其物物有其容今君之容非其物也以此驗之物者心貌哀戚之實以稱其服若介冑則有不可犯之色也蓋哀戚者喪禮之實衰者外飾之容若但服衰於身而心貌無哀戚之實者寧如不服衰也

齊衰不以邊坐大功不以服勤

注邊偏倚也疏喪服宜敬坐起必正不可著

衰而偏倚也言齊衰則斬衰可知大功雖輕然亦不可著衰服為勤勞之事也

張子曰齊衰不以邊坐有喪者專席而坐也

縣子曰綌衰總裳非古也

注非時尚輕涼慢禮葛也總疏布時尚輕細有喪

者不服羸衰但疏葛為衰  
總布為裳故曰非古也

方慤曰古之五服自斬至總一以麻若以綌  
為衰以總為裳則取其輕涼而已非古制也

叔仲皮學子柳

注叔仲皮魯叔孫氏之族  
學教也子柳仲皮之子

叔仲皮死其

妻魯人也衣衰而繆經

注衣當為齋壞字也繆當為不  
膠垂之膠士妻為舅姑之服也

言雖魯鈍其  
於禮勝學

叔仲衍以告

注告子柳言此非  
也衍蓋皮之弟

請總衰而

環經

注總衰小功之縷而四升半之衰環經弔服之經  
時婦人好輕細而多服者衍既不知禮之本子柳

亦以為然而請於衍  
使其妻為舅服之

曰昔者吾喪姑姊妹亦如斯末吾

禁也

注衍答子柳也姑姊妹在室齊衰與婦  
為舅姑同末無也言無禁我欲其言行退使其妻

總衰而環絰

注婦以諸侯之大夫為天子之衰弔服之絰服其舅非疏言叔仲皮教訓其子子

柳雖受父教猶不知禮在後皮死子柳之妻是魯鈍婦人猶知為舅著齊衰服膠絰謂絞麻為絰衍是皮之弟子柳之叔見當時婦人好尚輕細反以子柳妻為非禮之服子柳亦以為然遂請於衍欲令其妻身著總衰首服環絰衍答子柳云昔者我喪姑姊妹我著總衰環絰無人於吾相禁明其得著總衰子柳得衍言乃使其妻著總衰而環絰膠讀喪服傳不膠垂之膠謂兩股相交也五服之絰皆然唯弔服環絰不膠爾

黃震曰膠古讀如椶木之膠然方氏謂兩股相交綢繆故云繆絰則當音綢繆之繆此服之重者也總衰之布細環絰則一股回環而不相綢繆此服之輕者也子柳雖受教於其父曾不若愚婦人之所為也此鄭氏以來之舊說而諸家從之者也唯陸氏云據文子柳乃叔仲皮之師其妻乃皮之妻妻為其夫叔仲

皮衣斬衰而繆經而叔仲衍以告子柳請使其妻為  
兄總衰而環經且言其妻嘗為吾姊妹亦服總衰小  
功之服然禮於夫之姑姊妹有服於夫之兄弟無服  
仲衍之請非也省室賈氏以陸說為長愚案若如陸  
說則學字不必改為數衣字不  
必改為衰繆字不必改為繆

乾學案陸氏之說甚善但如舊說則是婦為  
舅姑服如陸說則是婦為夫之兄服古無夫  
兄弟之服衍豈得叛為之還當以舊說為是  
又案若從陸說則上其妻為皮之妻下其  
妻為衍之妻文義亦不順故不如仍從舊說

也

雜記朝服十五升去其半而總加灰錫也

注總精麤與朝服同去其

半則六百縷而疏也又無事其布不灰焉疏朝服精細全用十五升布為之總麻十五升之內抽去其半以七升半用為衰服也加灰者取總以為布又加灰治之則曰錫

朱子曰總十五升抽其半者是一窳只用一經如今

廣中疏布又如單經黃草布皆只一經也然小功十

二升則其縷反多於總矣又不知是如何

端衰喪車皆無等

注喪車惡車也喪者衣衰及所乘之車貴賤同孝子於親一也衣衰言端

者玄端吉時常服喪之衣衰當如之疏端衰謂喪服上衣以其緇六寸之衰於心前故衣亦曰衰端正也吉時玄端服身與袂同以二尺二寸為正而喪衣亦如之故曰端衰天子至士制度同無等差之別也

凡弁經其衰侈袂

注侈猶大也弁經服者弔服也其衰錫也總也疑也袂之小者二尺二寸

大者半而益之則侈袂三尺三寸疏凡弔服首著弁經身著錫衰總衰疑衰此等三衰大作其袂凡常服之袂二尺二寸此等三衰之袂半而益一大三尺三寸也若士則其衰不侈故周禮司服有玄端素端注云變素服言素端者明異制大夫以上侈之明士不侈故稱端

周禮天官內司服凡命婦共其衣服共喪衰亦如之凡

命婦者兼外內命婦也外命婦喪衰謂王服齊衰於后無服若九嬪以下及女御於王服斬衰於后服齊衰也

春官小宗伯縣衰冠之式于路門之外

注制色宜齊同

肆師禁外內命男女之衰不中灋者

注外命男六卿以出也內命男朝廷

卿大夫士也其妻為外命女內命女王之三夫人以下不中灋連升數與裁制者

地官閭師不績者不衰

注不衰喪不得衣衰也疏婦人不績其麻者死則不為之著

衰裳以罰之也

開元禮凡衰裳之式並同儀禮其麻之升數則斬衰正

服加服衰裳三升義服三升半

布八十縷為升

齊衰三年正

服加服衰裳四升義服五升其縷四升半成布四升

齊衰期降服衰裳四升正服五升義服六升義服齊

衰三月者衰裳六升大功降服衰裳七升正服八升

義服九升小功降服正服衰同十升義服十一升

總麻正服義服衰同十五升去其半有事其緦無事其  
布

政和禮古衰裳之制凡衰外削幅裳內削幅裳前三幅  
後四幅皆三辟攝之斬衰衰與裳皆不緦緝齊衰而下  
衰則外緦裳則內緦又以方一尺八寸之布置背上緦



著領下垂之出於辟領外一寸又以博四寸之布為領  
出於袷之兩旁又以長六寸博四寸之布綴於衣外襟  
廣袷當心衣帶下尺衽二尺有五寸以掩袷之兩際袂  
屬幅衣自領至腰長二尺有二寸袷長尺二寸 凡五  
服袷裳以布之精細為之等 凡斬袷之裳以繩為帶  
齊袷之裳以布為帶

溫公書儀袷裳之制斬袷用極麤生布為之不緝衣縫  
向外裳縫向內裳前三幅後四幅每幅作三幅音皆屈

兩邊相著空其中負版方一尺八寸

此尺寸皆用周尺

在背上

綴於領下垂放之辟領方四寸置於負版兩旁各攬負版一寸亦綴於領下袞長六寸廣四寸綴於前衿當心衣長過腰足以掩裳上際袷用布三尺五寸留上一尺正方不破旁入六寸乃向下邪裁之一尺五寸去下畔亦六寸橫斷之留下一尺正方以兩正方左右相脊綴於衣兩旁垂之向下狀如燕尾掩裳旁際 齊袞以布稍麤者為寬袖襴衫 大功小功總麻皆用生白絹為

襴衫 凡緝者皆向外撚之 小祥則除負版及衰大

祥後服皂布衫 凡齊衰以下皆當自制其服而往會

喪今人多忌諱皆仰喪家為之喪家若貧親戚異居者

自制而服之禮也

溫公自注禮弓曰與其不當物也寧無衰注不當物謂精麤廣狹不應法

制古者五服皆用布以升數為別每幅二尺二寸其經以八十縷為一升同服之中升數又有異者焉故問傳曰斬衰三升齊衰四升五升六升大功七升八升九升小功十升十一升十二升總麻十五升去其半有事其縷無事其布曰總蓋當時有織此布以供喪用者布之不論升數久矣裴莒劉岳書儀五服皆用布衣裳上下異制度略相同但以精麤及無負版衰為異爾然則唐五代之際士大夫家喪服猶如古禮也近世俗多忌諱

自非子為父母婦為舅姑妻為夫妻為君之外莫肯服  
布有服之者必為尊長所不容衆人所譏謂此必不可  
強此無如之何者也今且於父母舅姑夫君之服粗存  
古制度庶幾有好禮者猶能行之又曰世俗五服皆  
不緇非也禮惟新衰不緇餘衰皆緇必外向所以別其  
吉服也下俚之家或不能備此衰裳之制亦可隨俗且  
作粗布寬袖襴衫然冠經帶不可闕也又曰齊衰之  
服其尊則高祖曾祖父母伯叔父母親則衆子兄弟兄  
弟之子而世俗皆服絹是與緇麻無以異也宋次道今  
之練習禮俗者也余嘗問以齊衰所宜服次道曰當服  
布襴頭布襴衫布帶今從之大功以下隨俗且用絹為  
之但以四脚包頭帕額別其輕重而已此子思所謂有  
其禮有其財無其時君子弗行者也以俟後賢庶為釐  
正之爾古者既葬練祥禫皆有受服變而從輕今世  
俗無受服自成服至大祥其衰無變故於  
既葬別為家居之服是亦受服之意也

家禮斬衰衣裳皆用極麤生布旁及下際皆不緝也衣縫向外裳前三幅後四幅縫向內前後不連每幅作三幅輒謂屈其兩邊相著而空其中也衣長過腰足以掩裳上際縫外向背有負版用布方尺八寸綴於領下垂之前當心有衰用布長六寸廣四寸綴於左衿之前左右有辟領各用布方八寸屈其兩頭相著為廣四寸綴於領下在負版兩旁各攬負版一寸

丘濬家禮儀節補喪服制度

度用指尺裁制之際又當量其人長短肥瘠以

為度 愚案喪服制度家禮備矣但詞義深古及附注所引用又多繁雜深於問學者固已瞭然於心若夫窮鄉淺學之士泥文者各執已見任情者妄有作為卒無定制竊不揣愚陋一本家禮而又考古禮經以參定之易簡古之辭以淺近之語庶幾學者易曉云

斬衰

凡用極粗生麻布為之斬不緝也

身

用布二幅各長四尺四寸用指尺每幅分中屈之為前後兩葉每葉長二尺二寸兩幅共四葉前兩

葉後兩葉屈訖然後將後兩葉縫合為脊縫留上四寸不合凡縫皆以邊幅向外後有縫者皆倣此袂即袖也用布二幅亦各長四尺四寸與衣身同亦分中屈之亦長二尺二寸縫連衣身前後四葉又縫合其下際以為袖案儀禮曰袂屬幅注謂不袪即袖之制也不削謂隨其布幅不用翦裁修飾 袪即袖之

長二尺二寸從下量上一尺縫合適即所謂辟領也  
之留其上一尺二寸不縫謂袖口適從衣身分中屈  
處直量下四寸即後兩葉脊縫原留不合處及在前  
兩葉之上邊前後四葉各橫裁入四寸當直量下四  
寸處分裁從邊入中四寸雖裁開不斷裁訖分摺所  
裁者向外當衣身兩肩為左右適在左肩向上向左  
為左適右肩向上向右為右適既轉所裁領別用布一  
者向外其間空闊處前後俱名為闊中領幅長一尺  
六寸闊八寸重摺為兩長條不斷分上下條上四寸  
下四寸將其下條之兩頭各裁去一塊方四寸除去  
不用留其中間八寸連上條裁訖將所留連上八寸  
處綴在衣身後兩葉合縫上原裁為闊中處以塞其  
空闊此謂後闊中既綴定又將上條分中斜摺兩帶  
頭向前綴在前兩葉原裁為闊中處此謂前闊中帶

下尺

又用布高一尺上縫衽用布二幅各長三尺五  
連衣身橫繞腰前後衽寸每幅上下各從一頭

直量入一尺先於上頭所量一尺處從左橫裁入中間六寸又於下頭所量一尺處從右橫裁入中間六寸然後從上邊所裁六寸處斜裁去尋下邊所裁六寸處分為兩片各長二尺五寸其兩片俱以所留一尺處為上用裁開處相向其上片蓋下片垂下兩條如燕尾狀綴在衣身兩旁當腋下蓋過帶下尺以掩裳之旁掩

**衰**

用布一片長六寸廣四寸綴在衣前左邊當心處

**負版**

用布一

尺八寸綴於衣後當補領下垂之以以上皆不經邊

**衣繫**

案禮疏有綴衰於外

外衿則必有內衿矣今世俗作衰綴帶於衣身兩衿之旁際如世俗所謂對衿衣者衣著之際遂使衰不當心殊失古制今擬綴繫帶四條一如朝祭等服以外衿掩於內衿之上則具服之際衰正當心矣

**裳**

裳用布七幅其長短隨人身前縫三幅作一聯後縫四幅作一聯前後不相聯每一幅作三箇幅子前三



幅九箇後四幅十二箇其作帳子也於每幅布上頭將入腰處用指提起布少許摺向右又提起少許摺向左兩相湊著用線綴住而空其中間以為帳子其大小隨人肥瘦大約帳子如今人裙帳相似但裙帳向一邊順去此帳子則兩邊相向爾其縫也邊幅皆向內前三後四共七幅同作一要要兩頭各有帶

齊衰三年用斬衰次等麤生布凡衣裳旁及下際皆緝身袂祛適帶下衽負版裳俱與斬衰同但布與緝邊不同

齊衰杖期制俱同上但用麤生布比齊衰三年所用者又次等爾衰負版辟領俱同上

丘濬家禮儀節補

案楊信齋附注謂旁親不用衰負版辟領以為朱子後來議論之定

者愚案齊衰有三年杖期不杖期之別然禮通謂之齊衰恐不當分別也使有所分別則古人必異其稱

矣當從家禮

本注為是

齊衰不杖期服制同杖期但用麤生布比杖期所用者

又次等爾

齊衰五月三月服制俱同不杖期

大功言布之用功麤大也服制同齊衰但用布比齊衰

稍熟爾無衰負版辟領餘竝同

小功言布之用功細小也服制同大功但用布比大功稍細熟爾

總麻總絲也治其縷細如絲也又以澡治苧垢之麻為經帶故曰總麻服制同小功但用極細熟布為之

黃幹曰今案衰服衣衽袂袪帶下自斬至總皆同惟衰負版左右辟領據儀禮注云前有衰後有負版左右有辟領孝子哀戚之心無所不在疏云衰者孝子有哀摧之志負者負其悲哀適者指適緣於父母不念餘事若然則此衰負版左右辟領四者惟子為父母用之旁親皆不用歟

楊復曰案注釋衰負版辟領三者之義惟子為父母用之旁親則不用也家禮至大功乃無衰負版辟領

者蓋家禮乃初年本也後先生之家所行之禮旁親皆無衰負版辟領若此之類皆從後來之議論定者正為

丘濬曰愚案服有五斬衰齊衰大小功緦麻是也惟斬齊二者謂之衰既同謂之衰則其制度必皆同矣但緦不緦異耳古人喪父以斬喪母以齊喪母而父在則齊杖期父沒則齊三年則是服之重者莫大乎斬與齊也齊衰服有三年杖期不杖期五月三月之異用布則有粗細不同若其制度則未必有異也使其有異古人必異其稱矣凡喪服上曰衰下曰裳五服皆同惟於斬齊二服又用布一片當心亦謂之衰意者古人因此特用以為名稱歟不然何功緦之稱則專取於用功治絲之義而於此乃獨以其上衣為名哉必不然也儀禮注所謂孝子哀戚之心無所不在特就其重者言爾豈具服者於其旁親皆無衰戚

之心特假是以為文具哉所見  
如此姑書之以俟知禮之君子

乾學案儀禮喪服經大功小功皆言布衰裳  
又言大功衰小功衰者不一而足即總麻三  
月下注疏亦言布衰裳則五服未有不用衰  
者且鄭注言五服之衰一斬四緝賈疏言凡  
衰者總五服而言而開元禮政和禮大功以  
下亦俱言衰裳則古人未嘗謂功總不用衰  
也乃溫公書儀則齊衰不用衰而易以寬袖

襴衫朱子家禮則自大功以下俱不用衰後  
之言禮者率以二先生之言為準於是輕喪  
皆不知有衰矣余往年過松江上海縣見有  
功總之喪者皆準古禮製衰服歎其風俗淳  
厚今世士大夫宜共討論而修明之所謂以  
禮為服制以興太平者也

朱子語類問古者男子殊衣裳婦人不殊裳今以古  
人連屬之衰加於婦人而以殊裳之制加於男子則

世俗之見皆以為怪而不以為禮也將如之何朱子  
答云若考得古制分明改之固善若以為難從俗無  
害 問周大述先生說云衰服不比尋常衫領邪帛  
盤旋者只用直布一條夾縫作領如州府承局衫領  
然黃寺丞又述先生語云如承局衫領者非古制當  
如深衣直領未知是否朱子答云周說誤也古制直  
領如今婦人之服近年禮官不曉乃改云直襴衫又  
於其下注云謂上領不盤遂作上領襴衫黃寺丞說

近是而未詳 問喪服之制朱子答曰衣帶下尺鄭  
注云腰也廣尺足以掩裳上際廖西仲云以布半幅  
其長如衣之圍橫綴於衣下謂之腰如今道服之橫  
攔但綴處稍高爾儀禮衰服用布有尺寸衣只列帶  
處此半幅乃綴於下以接之廖說是也 問喪服記  
云衽二尺有五寸注謂凡用布三尺五寸周文云三  
尺五寸布裁為兩處左右相沓一邊之衽也彼邊亦  
然廖文圖說惟衰服後或有之似只用三尺五寸之



布裁為兩衽分為左右亦相沓在後與心聲啓圖合  
恐不掩裳之兩際如何朱子答曰詳廖之圖及釋錄  
示又批於原書行間云衽既以丈尺計之合如廖說  
可更分於兩旁自足以掩之矣 朱子曰今人齊衰  
用布太細又大功小功皆用苧布恐皆非禮大功須  
用市中所賣大麻布稍細者或熟麻布亦可小功須  
用虔布之屬古者布帛精麤皆有升數所以說布帛  
精麤不中度不驚於市今更無此制聽民之所為所

以倉卒難得中度者只得買來自以意擇製之爾

又曰喪服葛巾極麤非若今之細也 因論喪服曰

今人吉服皆已變古獨喪服必欲從古恐不相稱閔祖云雖是如此但古禮已廢幸此喪服尚有古制不猶愈於俱亡乎直卿亦以為然先生曰禮時為大某嘗謂衣冠本以便身古人亦未必一一有義又是逐時增添名物愈繁若要可行須是酌古之制去其重複使之簡易然後可又云一人自在下面做不濟事

須是朝廷理會一齊與整頓過又云康節說某今人  
須著今時衣服忒煞不理會也 子升因問喪禮如  
溫公儀今人平時既不用古服却獨於喪禮服之恐  
亦非宜兼非禮不足哀有餘之意故向來斟酌只以  
今服加齊經曰論來固是如此只如今因喪服尚存  
古制後世有願治君臣或可因此舉而行之若一向  
廢了恐後來者愈不復識矣 問喪禮服今人亦有  
欲用古制者時舉以為吉服既用今制而獨喪服用

古制恐徒駭俗不知當如何曰駭俗猶些小事但恐用之未必是爾若果考得是用之亦無害又曰溫公儀凶服斬衰古制而功總又却不古制是何說也古者五服皆用麻但布有差等皆有冠經但功總之制小爾又問君喪冠服答曰今考政和五禮喪服却用古制準此而行則亦無特然改制之嫌

楊信齋儀禮圖

家禮及勉齋儀禮  
旁通圖與此悉同

裁辟領四寸圖

目下  
和和  
和和  
和和




辟領四寸為左右適圖



裁衽圖




別用布長一尺六寸八分  
塞闊中領圖



反摺向前圖




兩衽相疊圖




燕尾狀

# 衰衣前圖




縫其下一尺留上一尺為袖口

# 衰衣後圖



裳制



幅三前      幅四後



楊復曰喪服制度惟辟領一節沿襲差誤自通典始  
案喪服記云衣二尺有二寸蓋指衣身自領至要之  
長而言之也用布八尺八寸中斷以分左右為四尺  
四寸者二又取四尺四寸者二中摺以分前後為二  
尺二寸者四此即尋常度衣身之常法也合二尺二  
寸者四疊為四重從一角當領處四寸下取方裁入  
四寸乃記所謂適博四寸注疏所謂辟領四寸是也  
案鄭注云適辟領也則兩物即一物也今記曰適注

疏又曰辟領何為而異其名也辟猶開也從一角當領處取方裁開入四寸故曰辟領以此辟領四寸反摺向外加兩肩上以為左右適故曰適乃疏所謂兩相向外各四寸是也辟領四寸既反摺向外加兩肩上以為左右適故後之左右各有四寸虛處當脊而相並謂之闊中前之左右各有四寸虛處當脊而相對亦謂之闊中乃疏所謂闊中八寸是也此則衣身所用布之處與裁之之法也注又云加辟領八寸而

又倍之者謂別用布一尺六寸橫闊八寸又縱摺而中分之其下一半裁斷左右兩端各四寸除去不用只留中間八寸以加後之闊中元裁辟領各四寸處而塞其闕當脊相並處此所謂加領辟八寸是也其上一半全一尺六寸不裁以布之中間從項上分左右對摺向前垂下以加於前之闊中與原裁斷處當肩相對處相接以為左右領也夫下一半加於後之闊中者用布八寸而上一半從項而下以加前之闊

中者又倍之而為一尺六寸焉此所謂而又倍之者  
也此則衣領所用之布與裁之之法也古者衣服吉  
凶異制故衰服領與吉服領不同而其制如此也注  
又云凡用布一丈四寸者周身八尺八寸衣領一尺  
六寸合為一丈四寸也此是用布正數又當少寬其  
布以為鍼縫之用然此即衣身與衣領之數若負衰  
帶下及兩衽又在此數之外矣但領必有袷此布何  
從出乎曰衣領用布闊八寸而長一尺六寸古者布

幅闊二尺二寸除衣領用布闊八寸之外更餘闊一尺四寸長一尺六寸可以分作三條施於袷而適足無餘欠也通典以辟領為適本用注疏又自謂喪服記文難曉而用臆說以參之既別用布以為辟領又不言制領所用何布又不計衣身衣領用布之數失之矣但知衣身八尺八寸之外又別用布一尺六寸以為凡用布共一丈四寸則文義不待辨而自明矣○又案喪服記及注云袂二尺二寸緣衣身二尺二

寸故左右兩袂亦二尺二寸欲使縱橫皆正方也喪服記又云袪尺二寸袪者袖口也袂二尺二寸縫合其下一尺留上一尺二寸以為袖口也

馮善家禮集說或問程氏遺書云古者八十縷為一升斬衰三升布則是二百四十縷於今之布已為細總麻十五升則是千有二百縷今蓋無有矣素程氏之說則今總麻當用何等布曰間傳云總麻十五升去其半則用六百縷布正是今之稍麗麻布宜用之但云斬衰三升布為細則比今之俗稱冷布者已為麗矣若三升布更嫌細則恐非三升織不成布矣

乾學案辟領之制楊說為長衽及衣帶之制

黃南山王浚儀之說最善得此數說而衰裳

之式無遺憾矣

呂柟曰斬衰裳者何衰裳皆斬也衰也者摧也摧折其心若不能以生明欲斬也猶曰天胡不斬我身云爾不斬則絞也故帶曰絞帶二者刑之極者也而孝子兼服之痛之甚也故縣子曰三年之喪如斬負版者負衰也負其摧悲之意於背猶曰前後無怙恃也辟領者適也適者責也開其領以責心也則何以至是乎痛之甚也練去首經負版辟領衰繩屨猶腰經不除婦人去腰經則奚冠奚衰奚帶曰其衰猶斬也其升同大功故禮曰服其功衰不言裳者衰之長或可以掩裳其今之直領長衫而不緝者乎今大夫士以下練而白布齊是斬衰一年也既葬而白布齊是斬衰三月也

金匱要略曰喪禮衰衣圖無內外衿與儀禮不合案儀禮喪服云衰長六寸博四寸注云廣衰當心也疏云綴於外衿之上故得廣衰當心觀此則衰衣有衿明矣今圖無衿而衰綴衣之左殊失當心之義

呂坤曰衰經之不分明也非所以示別也斬衰重故期降二等總麻輕又降小功二等布以升數經以指寸庶幾其準乎案斬衰之布以三升則二百四十縷此至重之服其餘不得接次今擬期之布以五百縷四百縷大功六升四百八十縷小功七升一百六十縷總麻八升七百二十縷麻經用中指大指之端除甲肉相抵圍圓一弧為斬衰大指頭抵中指第二節為齊衰大指抵中指第三節為大功大指頭抵中指第四節為小功虎口上緊圍圓為總麻總麻之經粗如小指服之制冠常經帶具而後成服五服未闋不敢除也故聖人重之總麻輕之至也猶麻況期功乎今也麻冠繭小功而下葛冠繭雖終身可也服者



服以飾情今也無情而飾雖終身可也

汪琬曰斬齊大功小功總麻五服之服通謂之衰雖弔服亦謂之衰鄭玄云凡服上曰衰下曰裳又五服之衰一斬四緋三山楊氏喪服圖衰裳之制五服皆同前有衰後有負版左右有辟領惟子為父母用之旁親則否此先王之禮然也蓋衰之為言摧也明孝子有哀摧之心也夫衰摧之心凡在五服中者莫不有之奚獨孝子亦曰孝子之於父母視旁親有加戚焉非謂旁親而遂可以不哀摧也然則五服之服通謂之衰宜矣顧近世士大夫自大功之喪而下舉無有服衰者皆非知禮者也案喪服傳大功布衰裳牡麻經無受或牡麻經又記宗子孤為殤大功衰小功衰皆帶經或牡麻經又記宗子孤為殤大功衰小功衰皆三月又雜記功衰食菜果飲水漿無鹽醢不能食食鹽醢可也此大功小功為衰之明驗也鄭玄云總麻

布衰裳而麻經帶又周禮王為三公六卿錫衰為諸侯總衰為大夫士疑衰此總麻為衰之明驗也自朱子家禮明集禮孝慈錄莫不仍之顧律令大功已下言服不言衰非不為衰也省文也士大夫亦無有服功衰總衰者此近世薄於旁親而然夫豈先王之制與或問衰衣之有衰負版辟領也果獨為父母用之與曰否經傳無明文鄭玄之注賈公彥之疏亦然如曾孫為曾祖父母也適孫祖在為祖母也為人後者為本生父母也是皆難以旁親例者也其遂可不用衰負版辟領與家禮之與儀禮圖說蓋各發明注疏而猶各有所未盡也吾故謂齊衰必當有二式

萬斯同曰古之五服未有用衰者不但齊斬用衰即功服亦曰功衰總服亦曰總衰其他弔服亦曰錫衰疑衰是可徵喪服之必用衰矣故開元政和二禮及明之集禮猶仍其制而不變乃溫公書儀則惟三

年用之朱子家禮則惟期服以上用之雖失古人之制猶曰已所著書原非盡依古禮也勉齋信齋素稱達於禮者其於儀禮一書析之極其精矣乃謂禮惟父母用衰而旁親皆不用是何敢於背禮而為此無稽之論也家禮功總不用衰或其未及改定之故正賴後人補之信齋反以期服用衰為過此豈可謂達禮者乎至於書儀之失尤不可言夫齊衰也可用寬袖襴衫乎大小功也可用白綯襴衫乎齊衰有三年母服亦將不用衰乎在公之意謂習俗如此何可奈何而為此說夫所貴乎君子者謂其能秉禮以正俗也今既不能正俗則已矣又以此筆之於書是非雅無以正之反若有以導之矣夫我不能強天下以由禮豈不能使吾身之由禮吾盡吾禮而世之從不從聽之而已今觀公之書則是公於喪服未必能一一如禮矣人望如公而為此非禮之服世之論者不謂公之徇俗而以公為樹之標必曰公猶如此吾

儕何為不然是因公之書而先王喪服之制將從此而盡廢其始也人猶以為陋製其繼也人竟以為禮服矣不意賢達如公而有是也況喪服禮之重者此而可徇將何者不可徇又何以著書垂訓為哉彼開元政和諸禮亦豈能強世之必從但制禮者不可不如是爾書儀家禮二書無事不折衷至善實萬世不刊之典也獨於喪服猶稍有遺憾吾故不能以無辨

乾學案古之喪服自三年至九月皆有受服以初喪之衰疏而易壞故至卒哭即易其衰而受之以成布書儀之不言受服者以有居喪常服也家禮既不言居喪之常服又不言

葬後之受服將齊斬之衰可服至三年期年  
之久乎抑葬後即除衰服但存齊衰期年斬  
衰三年之名乎凡此皆朱子之偶失而後人  
之所當補也乃秦溪瓊山亦竟未有補之者  
於此書寧無遺憾哉

墨衰

左傳僖公三十三年晉原軫曰秦違蹇叔而以貪勤民  
天奉我也

注奉與也

奉不可失敵不可縱必伐秦師遂發命

遽興姜戎子墨衰經

注晉文公未葬故襄公稱子以凶服從戎故墨之

夏四月

辛巳敗秦師于殽遂墨以葬文公晉於是始墨

注後遂常以為

俗記禮所由變

襄公二十三年晉樂盈畫入絳公有姻喪

注夫人有杞喪

疏杞孝

公卒夫人有兄弟之喪是有杞喪也

樂王鮒使范宣子墨衰冒經

注晉自殺戰還

遂常墨衰蒙壯麻經冒經者言以經冒其首也

疏夫人為其兄弟當大功喪服大功布衰

為夫人孝服也

二婦人輦以如公

注恐樂氏有內應距之故為婦人服而入

奉公以

如固宮

張子全書父在為母服三年則家有二尊有所嫌也  
處今之世服齊衰一年外以墨衰從事可以合古之  
禮全今之制

朱子語類問今之墨衰便於出入而不合禮經如何  
曰若能不出則可以不服但有出入治事只得服之  
喪服四制說百官備百物具不言而事行者扶而起  
言而後事行者杖而起身執事而後行者面垢而已  
蓋惟天子諸侯始得全申其禮庶人皆是自執事不

# 得申其禮

王廷相集或問三年之喪衣服何如曰衰練之服雖不能備而縞冠麻衣經帶終制一日不可墨其衰庶乎喪之

大節也

馮善家禮集說或問墨衰今宜服之否曰未葬服斬衰葬後服葛衫今人服生麻布衫小祥換練服墨衰不必服也

姚翼家規通俗編今世人謁見有司貴官及臨吉事往往衰凶服而襲吉服亦曰墨衰夫曰我非貴官既不可凶服入公門而事闕身家不得不謁有司者則從權而墨可也若我與有司相敵可以凶服見者則不必墨其餘若鄉之貴官及親友吉事視吾親輕重何如也何以墨哉



乾學案墨衰之制本後世失禮之事乃秉禮如張子欲服於母喪期年之外而朱子亦謂出入治事可以服之豈墨衰竟可為禮服乎愚謂母喪三年朝廷既定之為制有何所嫌而必欲墨其衰若夫出入治事難服齊斬則易以白布之衣如書儀所載葬後常服可也如曰衰不可廢而加之以墨則是欲守古而反大戾乎古欲盡禮而實大背乎禮矣不亦

作偽之至哉姚翼所言亦末俗之陋習不可  
為訓揆時度理王馮二子之說得其衷矣

附深衣

朱子語類荅麤布深衣加袷云深衣為古之便服朝

玄端夕深衣吉服依玄端於凶服亦仿為之則宜矣

文天祥深衣吉凶通服說深衣篇大槩三節第一節  
言其制短無見膚長無被土以下是也第二節言其  
義規者行舉手以為容以下是也第三節言其用可  
以為文可以為武以下是也此雖三節然畢竟義為  
之主故篇首曰以應規矩繩權衡其文坦易明白前  
輩解之悉矣獨吉凶通服猶有可疑或謂考之本篇

曰可以為文可以為武可以擯相可以治軍旅而不  
曰可以弔喪可以受弔曰善衣之次而不曰喪服之  
次雖其間有孤子則純以素一語近於喪服則又曰  
鄭氏注年三十以下無父稱孤則是無父而服此衣  
當用純素爾非孤子於居喪之中可以此代喪服也  
其必以為吉服之說如此然愚嘗參互經傳博采旁  
證則此雖吉服未見其不可通於凶事案檀弓將軍  
文子之喪既除喪而後越人來弔主人深衣練冠待  
於廟垂涕洟注云深衣練冠凶服變也蓋既除喪則  
不當復衣喪服故以深衣受弔以喪服一變而即用  
深衣則深衣雖謂之喪服之次可也雖與善衣之次  
之說相反正足以見其互相發明爾案曾子問親迎  
女在塗而壻之父母死如之何孔子曰女改服布深  
衣縞總以趨喪注云婦人始喪未成服之服蓋成乎  
婦則成乎婦服惟其未成婦也不可以衰故趨喪以  
深衣然則此亦凶服之變也今世女子未聞有服深

衣者然以此事考之凶事而可服其服於吉事可知也注云禮教久廢故女遂廢此衣爾案雜記大夫卜宅與葬日有司麻衣布衰注曰麻衣白布深衣而著衰焉此服非純吉亦非純凶也夫衰凶服也深衣吉服也衰之下有深衣焉故非純凶深衣之上有衰焉故非純吉由此論之深衣不專用於吉事又可見也案問傳大祥素縞麻衣注云麻衣十五升布深衣謂之麻者純用布無米飾也蓋大祥已除衰杖本須服吉然使使用米飾之服則孝子之餘哀未忘必不安於此故魯人朝祥而暮歌子路笑之有子既祥而縗屨組纓記禮者譏之此所以用深衣者蓋在不衰不米飾之間也案喪服記公子為其母麻衣縗緣注云麻衣小功布深衣以麻為小功布者以大功條云公子之庶昆弟為其母若父卒為母大功父在降大功一等用小功布深衣以此證之深衣固為大祥之服而亦為小功之服但大祥緣以布小功緣以縗爾夫

以深衣正篇本專為吉服而言然略以此數節推之  
其於凶服亦自可通大槩喪服皆用布而以精麤為  
輕重之等鄭氏云深衣用十五升布鍛濯灰治升八  
十縷則是千二百縷為經此今世極細之布也然則  
深衣之所以為吉服者以其布之精密又布易得而  
難損取其貴賤可以通服經所謂完且弗費注所謂  
可苦衣而易有者也而揆之喪服則用布適同而為  
色又相似且經鍛濯灰治故止可用之於服輕者爾  
非如他衣服用繒帛米色則當專施於吉而不可通  
於凶也此正如近世涼衫爾卓陵以前士大夫皆以  
為會聚之常服其後遂於弔喪用之則亦以其顏色  
可通之故正此類也但是深衣之制領緣不同其間  
純以績者乃是以盡飾為美此恐專為吉服而不當  
與凶服通至於用素用緜自是喪服本色獨用青者  
則通於吉凶之間皆無舛爾若夫冠屨一節却欠商  
議今人謂服深衣必須用某冠某屨此恐未明蓋冠

屨之制深衣正篇既不曾見明言而其散見於他傳者其冠亦各有變如將軍文子之喪主人深衣練冠是受弔之時方用練冠也其施之吉則固有他冠矣如女用深衣之縞總則趨喪而後變用縞總也其在平時必有他以為之總者矣又如漢制乘輿服深衣則用通天冠高九寸是天子而後有此冠也推而下之諸侯大夫士以至庶人豈當拘於一冠矣乎竊意深衣有一定不易之制而本篇所以不戴冠屨者恐冠屨當是從時爾何以辨之夏之冠曰毋追殷之冠曰章甫周之冠曰委貌又曰玄冠三代之冠其制已各不同有虞氏深衣而養老則深衣自虞氏已有之此時自須用虞氏之冠尚不及有三代之冠也又安得所謂某冠者以是推之深衣則古矣而冠屨則無定制也孔子少居魯衣逢掖之衣長居宋冠章甫之冠衣少所居之服冠長所居之冠二者參用各隨其宜初不必曰魯服則魯冠宋冠則必宋服也以聖人

於時且然況今世而服深衣者其為冠屨也既不載於經則其隨時也為得矣必欲用其冠其屨則恐又失之泥也然則所謂隨時者宜何如其以深衣為吉服則今之緇冠為不必易也如其以為凶服則受弔者固當以檀弓練冠為法而往弔者亦須知之玄冠不以弔故也嗚呼禮之時義大矣哉器數之精微制度之詳密雖以夫子之聖不敢自謂生知而屈意於一問區區何人乃敢率其胸臆評論千載之上多見其不知量也雖然亦識其所見云爾尚以俟有考者

乾學案深衣雖吉服然古人於喪中往往用之如文公所援引最為明確故今備錄其說附於衰服之後

婦人衰裳

溫公書儀斬衰婦人用極麤生布為大袖及長裙衆妾以背子代大袖 齊衰婦人以布稍細者為背子及裙

大功婦人以生白絹為背子及裙 小功總麻婦人

勿著華采之服而已

公自注云古者婦人衣服相連今不相連故但隨俗作布大袖及裙

而已

家禮斬衰婦人用極麤生布為大袖長裙皆不緝衆妾

則背子代大袖



齊衰三年婦人服制

大袖

長裙

背子

俱同斬衰但用布稍

細緝

齊衰杖期婦人服制

俱同上

大功婦人服制

同上但用布稍熟

小功婦人服制

同上但用麻布稍熟細

總麻婦人服制

同小功但用熟麻布極熟細者

朱子曰婦女之服古禮不可考用溫公書儀可也

楊復曰儀禮婦人不殊裳衰如男子衰下如深衣無帶下又無衽夫衰如男子未知備負版辟領之制與

否下如深衣未知裳用十二幅與否此雖無文可明但衣身必二尺二寸袂必屬幅裳必上屬於衣裳旁兩幅必相連屬此所以衣不用帶下尺裳旁不用袷也今考家禮則不用此制婦人用大袖長裙蓋頭男子衰服純用古制而婦人不用古制此則未詳

丘濬曰愚案此言則婦人亦有衰服但衰與裳相連而無帶下與袷爾今無可據雖不敢為負版辟領之制然亦宜用極麤生布如深衣制度為之上身外其縫裳用十二幅內其縫斬衰則不緝齊衰下則緝之然既謂之衰則亦宜於衣左衽上如男子服制綴布一片以為衰雖未必盡合古制然猶仿佛古人遺意之一二如此則女皆古服矣謹書所見如此以俟知禮君子質焉

丘濬家禮儀節補婦人服制大袖

用極麤生麻布為之如今婦人短衫

而寬大其長至膝袖長一尺二寸其邊皆縫向外不  
縫邊準男子衰衣之制案古者婦人皆有衰家禮  
本書儀而代以時俗之服所謂大袖者今世不知何  
等服也今人家有喪婦女或為短衫或為長衫其制  
不一案事物紀原唐命婦服裙襦大袖為禮衣又云  
大袖在背子下身與衫子齊而袖大及考衫子之制  
乃云女子衣與裳連至秦始皇方令短作衫衣裙之  
分自秦始也據此說則大袖長短與衫子齊衫子既  
是秦所作之短衫則大袖亦是衫之短者但袖大爾  
然謂之大袖則裁制必須寬大今準以衰袂之袂為  
長尺二寸蓋準袂恐太長裙用極麤生麻布六幅為  
長故酌中而準以袂爾長裙之六幅共裁為十二破  
聯以為裙其長拋地其邊幅俱縫內向不縫邊準男  
子衰裳之制案事物紀原隋作長裙十二破今大  
衣中有之然不謂之幅而謂之破意其分一幅而為  
兩也故擬其制如此然古禮婦女亦有衰不若準衰

裳之制前三幅後四幅每幅為三幅  
子為不失古意姑書所見以俟擇者

胡翰曰朱子定禮男子自總以上莫不悉遵乎古而  
婦人之服豈宜以俚俗參之若大袖遮頭竹釵布頭  
帶之屬考之於古何服也古者婦人不殊裳非無衰  
也其衰之下與男子異爾非今大袖也檀弓注云去  
纚而露髻夫云露髻則以麻繞額與髻爾非今遮頭  
也婦人不冠布總箭筈傳云總六尺長六寸箭筈長  
尺猶今釵與頭帶爾而今云竹釵布帶亦非制也五  
禮廢久矣惟喪服民間尚多用之今冢子斬衰裳直  
經杖絞帶冠繩纓菅屨即位而有事於外冢婦大袖  
遮頭竹釵布頭帶即位而有事於內何啻黃鍾大呂  
而間以師延靡靡之樂犧尊龍勺而著之玉杯象箸  
之間其清也甚矣是非朱子意也門人不察之過也  
問喪之記云親始死難斯徒跣說者謂難斯當作筓  
纚夫纚以黑繒韜髮士冠禮所謂纚廣終幅長六尺

者以之即吉可也而凶事  
去之此又漢儒之不察也

呂坤曰婦人斬衰冠服同於男子近世之謬也竹  
布總蓋頭衣裳仍其裙衫是男女之別也布之升  
陽縫斬衰杖經同又曰禮家之制皆如此而近世  
之且婦人不首經古之布總即今所謂布頭簪也  
稍細布狀如假髻以束髮而羅麻經於上  
其首經要經竹杖桐槐之制皆同男子禮  
汪琬曰或問婦人可以斬衰乎曰不可服以飾情  
貌相配吉凶相應故衰之為服所以表中誠也  
者何獨不然由是言之是雖旁親猶不可以不  
衰而况妻為夫妾為家長女子子為父母乎

讀禮通考卷三十一

欽定四庫全書

讀禮通考卷三十二

刑部尚書徐乾學撰

喪服三

冠

既夕記冠六升外繹纓條屬厭

注繹謂縫著於武也外之者外其餘也厭伏也

冠武謂冠卷以冠前後皆縫著於武若吉冠則從武上向內縫之繹餘在內謂之內繹若凶冠從武下鄉外縫之謂之外繹厭伏者以其冠在武下過鄉上反縫著冠冠在武下故云厭也五服之冠皆厭但此冠上下據斬衰而言也

喪服記斬衰冠六升受冠七升齊衰冠七升受冠八升

總衰冠八升

詳見上  
衰裳卷

雜記喪冠條屬以別吉凶三年之練冠亦條屬右縫小

功以下左

注別吉凶者吉冠不條屬也條屬者通屈一條繩若布為武垂下為纓屬之冠象太古喪

事略也吉冠則纓武異材焉右縫者右辟而縫之左辟象吉輕也疏此言吉冠則纓與武異材喪冠則纓與

武共材故云別吉凶也三年練冠小祥之冠也雖微入吉亦猶條屬與凶冠不異也吉冠則襦上辟縫向左左

為陽陽吉也凶冠縫向左右右陰也過小祥猶條屬縫向右也小功以下輕故縫同吉向左也

大白冠緇布之冠皆不綈委武玄縞而后綈

注不綈質無飾也大



白冠大古之布冠也委武冠卷也秦人曰委齊人曰武  
玄玄冠也縞縞冠也疏大白冠白布冠也縹布冠黑  
布冠也二冠無飾故皆不蕤此縹布冠謂大夫士之冠其  
諸侯則玉藻云縹布冠績縷是也玄縞二冠既先有別  
卷後乃可蕤故云而后蕤也大祥縞冠亦有蕤何以知  
之前既云練冠亦條屬右縫則知縞不條屬既別安卷  
灼然有蕤也

檀弓喪冠不縷

注去飾

陳澧曰冠必有筓以貫之以絃繫筓順頤而下結之  
曰纓垂其餘於前者謂之縷喪冠不縷蓋去飾也  
吳澄曰吉冠既結其纓而垂其餘者為飾謂之縷喪  
服斬衰冠以繩為纓齊衰以下冠以布為纓其纓結  
於頤下而無所垂之餘喪哀從  
質非如吉冠之文而有飾也

古者冠縮縫今也衡縫故喪冠之反吉非古也

注縮從也今禮

制衡讀橫今冠橫縫以其辟積多疏古自殷以上也縮直也殷以上質吉凶冠皆直縫直縫者辟積禡少故一一前後直縫之周世文冠多辟積不復直縫多作禡而橫縫之周吉冠文故多積禡而橫縫若喪冠領猶疏辟而直縫是喪冠與吉冠相反時人因謂古時亦相反記者釋云非古也明是周世如此古則吉凶同直縫

橫渠張氏曰吉冠之制豎搭過布布幅以二尺二寸

為率則前後共有四尺四寸首圍所占之外餘廣尚

多而為縫以文多故為吉凶冠則橫繞布直縫無文

至後世不然故曰喪冠之反吉非古也

陳祥道曰一幅之材順經為辟積則多而文順經為縮縫順緯為橫縫古者吉凶之冠皆縮縫今吉冠橫縫而喪冠縮縫是喪冠與吉反矣故記者識之

玉藻縞冠玄武子姓之冠也

注謂父有喪服子為不純吉也武冠卷也古者冠卷

殊

縞冠素紕既祥之冠也

注紕緣邊也巳祥祭而服之間傳曰大祥素縞麻衣疏

武用玄玄是吉冠用縞縞是凶吉而雜凶故云不純吉也紕謂緣冠兩邊及冠卷之下畔其冠與卷身皆用縞但以素緣兩縞是生絹而近吉當祥祭之時身著朝服者著縞冠以其漸吉故也既祥之後微申孝子哀情故加以素紕以素重於縞也皇氏以為縞重素輕不知何據

陸佃曰縞冠玄武孫為祖既祥之冠縞冠素紕子為父既祥之冠上言子姓下言既祥相備也縞冠玄武

在上父親而先祖也期而小祥孫為祖服除矣而父之服未除不敢純吉以有承重之端焉

方慙曰既祥之冠不以布而以縞者吉事之先見也純不以采而以素者有禫餘哀故也子姓之冠用縞以示凶為祖之亡也武用玄以示吉為父之存也冠在上武在下冠為外武為內為祖而縞尊尊於上也為父而玄親親於下也為祖而凶制義於外也為父而吉本仁於內也

大帛不緇

注帛當為白聲之誤也大帛謂白布冠也不緇凶服去飾

開元禮斬衰之冠六升右縫通屈一條繩為武垂下為

纓冠外緹

外緹者冠前後屈而出於武外厭縫之也

小祥練八升布為冠纓

武亦如之大祥縞冠素純纓禫祭玄冠皂纓 齊衰三

年冠七升右縫布纓武冠內緹小祥練九升布為冠纓  
武亦如之 齊衰杖期不杖期五月三月降服冠七升

正服八升義服九升右縫布纓武冠內緹 大功降服

正服冠十升義服冠十一升 小功殤降服正服冠十

升義服冠十一升

冠左縫  
不厭

成人降服正服冠十一升義

服冠十二升

總麻冠十五升去其半

左縫  
不厭

政和禮凡冠制斬衰通屈繩為武齊衰以降以布為武  
總麻澡治其布為武皆垂其下為纓其冠以布為三辟

禡前後屈而出於武其外厭而縫之為外緹其內厭而縫之為內緹大功以上辟禡向右小功以下辟禡向左溫公書儀冠比衰布稍細廣三寸跨頂前後以紙糊為材上裹以布為三輒皆向右縱縫之兩頭皆在武下向外反屈之縫於武用麻繩一條從額上約之至頂後交過前各至耳於武上綴之各垂於頤下結之 齊衰以布稍細者為布四脚其制如幅巾前綴二大脚後綴二小脚以覆髻自額前向頂後以大脚繫之大暑則屈後

小脚於髻前繫之謂之幘頭 大功以生白絹為四脚

### 大祥後服垂脚黥紗幘頭

陳師道集司馬溫公云仁宗崩有司用乾興故事羣臣布四脚如冠時莫識其制以幅巾幕首破其後為四脚其後鄭毅夫讀續事始云三代黥首以皂絹裹髮周武帝裁為四脚名幘頭馬周請重繫前脚盖布四脚脚皆後垂如周制遇暑則繫其前脚如唐制英宗崩宋次道誤為布幘頭有司遂用民間幕喪之服以今漆紗幘頭去其鐵脚而布裹之前繫後垂而不可加冠壞之而冠幘頭之失自次道始也余謂四脚加冠今士大夫喪冠是也大布之冠古也四脚今也於禮為繁矣





陳祥道禮書吉凶冠式

冠制

周委貌冠




有梁有武有綬  
有纓有純




釋名曰委貌工  
小下大

夏毋追冠




狀如覆杯

緇布冠




古時不綏  
後世有綏

冠姓子




縞冠玄武  
其制厭

冠祥既



縞冠素紕其  
制厭無綏

大 白 冠



其制厭不綏

乾學案此書本載喪禮所以及於吉冠者因  
陳用之禮書不列喪冠圖欲知喪冠不可不  
知吉冠故也

家禮斬衰冠比衣裳用布稍細紙糊為材廣三寸長足  
跨頂前後裹以布為三幅皆向右縱縫之用麻繩一條  
從額上約之至頂後交過前各至耳結之以為武屈曲  
兩頭入武內向外反屈之縫於武武之餘繩垂下為纓  
結於頤下 齊衰三年冠制竝如斬衰但用次等麤生

布為之又以布為武及纓 齊衰杖期冠制同上但又  
用次等生布 齊衰不杖期冠制同上但又用次等生  
布 大功冠制同上但用稍熟布以上辟積縫皆向右  
小功冠制同上但用稍熟細布辟積縫向左 總麻  
冠制同上但用極細熟布辟積縫向左

丘濬家禮儀節補冠

即所謂梁也稍厚紙為梁廣三寸長足以跨頂前後用稍細布

裹之就摺其布為細幅子三條直過梁上其幅俱向  
右是謂三辟積其梁之兩頭盡處卷屈向外以承武  
是謂武用麻繩一條折其中從額上約之至纓又以  
外緹武頂後交過前各至耳邊結住以為式纓武之

餘繩垂下為纓結於頤下案禮喪冠條屬合冠制先  
疏謂纓武同材今世俗別用繩為之非是冠梁折彎安在武內又於冠梁兩頭盡處各出少許  
於外向上一却將武安在其上向外縫之垂纓兩旁下  
結

齊衰

冠制俱同惟武與纓不同

武

用布一條重疊之折其中從頤上約之項後交過前各至耳用

線綴之為武各垂其末稍為纓結之頤下案世俗  
齊衰下冠武往往背紙為材用布裏之別以布為纓  
非儀禮條屬之制不可用






家禮喪冠圖


斬衰冠

冠闊三寸



齊衰冠

冠闊三寸



大功冠制同齊衰 小功冠辟積向左餘同大功

總麻冠澡纓餘同小功

丘濬曰案今世俗於冠兩旁當耳處垂兩繖  
絮不知於禮何據意者用充耳之說而誤邪

黃榦曰案五服之喪冠其制之異者有四升數之不

同一也

斬衰正服義服冠皆六升齊衰三年杖期與  
不杖期降服冠皆七升正服冠皆八升義服

冠皆九升齊衰三月冠九升大功殤服大功正服與  
小功殤服冠皆十升大功義服與小功正服冠皆十

一升小功義服冠十二升繩纓之與布纓澡纓二也  
升總麻十五升抽其半

惟斬

衰用象麻繩為纓自齊三年至小功皆用布  
為纓總冠澡纓繩之大小布之升數未詳

右縫之

與左縫三也

大功以上哀重辟積之縫向左右小功以下哀輕辟積之縫向左右

勿灰之

與灰四也

惟斬衰鍛而勿灰蓋以水濯之而已勿用灰自齊三年以下皆用灰治之總則有事

其縷復也

其制之同者亦四條屬一也

屬猶著也著之冠垂之為

縷也吉冠纓武異材凶冠纓武同材斬衰則用一條繩齊衰以下則皆用一條布從額上約之至項後交過兩廂各至耳綴之為武其餘垂而結之頤下者為纓

外畢二也

外畢者冠落額前後兩頭

皆在武下向外出反屈之縫於武而為之兩頭縫畢向外案曲禮云厭冠不入公門厭猶伏也喪冠厭伏是五服同名由在武下出反屈之故得厭伏之名又檀弓云古者冠縮縫今也橫縫故喪冠之反吉非古也是吉冠則辟積無殺橫縫亦兩頭皆在武上向內反屈而縫之不得厭伏之名

辟積之數

三也

自斬至總其冠皆三辟積

廣狹之制四也

自斬至總其冠皆廣三寸

呂柟曰吉冠纓武異材喪冠纓武同材斬衰之冠則又異於他衰冠也故繩纓以辨布纓漂纓也約屬以辨布武漂武也右縫以辨小功總麻也外畢以辨吉冠也故天子右縫十有二帔皇太子親王右縫九帔皇孫諸王右縫七帔卿大夫右縫五帔士及庶人右縫皆三帔服圖說曰古者五服皆三帔朱子曰天子當十二梁羣臣如其本品文皇后之喪期東宮親王熟布練冠九帔皇孫熟布冠七帔皇孫女熟布蓋頭則大夫士亦可例降也今大夫士皆熟纈裏大帽不然則熟麻帽然其廢冠則一也古者婦人去腰經則葛帶今不帶古者練冠緣緣今不緣緣不緣緣可不帶不可天子白羅袍銀帶絲鞋白羅軟角巾卿大夫士布襴衫宋王淮之議也

董文驤喪冠纓武條屬辨鄭釋喪服斬章苴經謂首  
經象縗布冠闕頂冠繩纓謂通屈一條繩為武垂下  
為纓釋雜記喪冠條屬以別吉凶亦同賈孔遂謂喪  
冠纓武同材其說非也喪冠自有武武為冠卷古者  
居冠屬武則喪冠之武不屬於冠而其材當亦用布  
為之升數同於冠雖斬衰至重未聞繩之可以為武  
也喪冠自有纓條屬之制其材蓋通屈一條繩若布  
為纓左頭屬冠遠頤而上下右頭亦屬冠略如吉冠之  
組絃非如吉冠之組纓左右以二組兩頭自筭而下  
結之頤下而有所垂為縷也故雜記云以別吉凶吉  
冠之組繫之筭不屬之冠喪冠之纓則屬之冠此吉  
凶冠纓之別也且喪服首經大扼右本在上朱子謂  
以麻尾藏麻根之下麻根搭麻尾之上殺之則此  
麻經固著於冠武之外遠頤環項若如舊說又將一  
繩約頤至項交過兩耳上綴之冠下垂之頤而交結  
之則是頤上項後內一繩為武外一繩為經有兩繩

相累矣內若布武尚可加以繩經內而繩武豈復可  
加以繩經兩繩累於額項安得固哉且喪服傳本文  
止言冠繩纓條屬據鄭解是繩武纓條屬也添注武  
於纓之外本文所無故知喪冠纓武雖相屬而材則  
別也愚意非居冠冠武不相屬則若喪冠者先著布  
冠後著布武以固冠而繩布之纓其條本屬武強於  
頤下麻經加於武外  
達於額項制略如此

### 括髮

儀禮士喪禮卒斂主人髻髮袒衆主人免于房

注始死將斬衰

者難斯將齊衰者素冠今至小斂變又將改初喪服也  
髻髮者去笄纓而紒免者齊衰將袒以免代冠冠服之  
尤尊不以袒也免之制未聞舊說以為如冠狀廣一寸  
用麻布為之狀如今之著慘頭矣自項中而前交於額

上却繞紒也于房于室釋髻髮宜於隱者疏知將斬  
衰難斯者問喪云親始死難斯徒跣注云難斯當為笄  
纓是將斬衰者難斯也將齊衰素冠者問喪斬衰男子  
笄纓明齊衰男子素冠可知髻髮去笄纓而紒者此即  
喪服小記云斬衰髻髮以麻為母髻髮以麻免而以布  
是母雖齊衰初亦髻髮與斬衰同故云去笄纓而紒紒  
上著髻髮也齊衰將袒以免代冠者此亦小斂節與斬  
衰括髮同時此皆據男子若婦人則用髻髮與髻髮皆  
以麻布自項而向前交於額上却繞紒如著慘頭焉免  
亦然但以布廣一寸為異也髻髮宜於隱者并下文婦  
人髻于室兼言之也

杜佑曰免之制未聞舊說以為如冠狀廣一寸著之  
自額而却交於項中并其未覆紒而前綴連之如冠  
象弁

教繼公曰檀弓曰始死羔裘玄冠者易之而已易者謂易之以素冠深衣也然則始死之服主人以下皆同而未暇有所別異今既小斂主人乃去冠與纁而以麻為髻髮衆主人以下乃去冠與纁而以布為免二者皆所以代冠也其制雖不可考然以意求之疑其度但足以繞紒而已以其無纁故謂之髻髮言括結其髮也以其無冠故謂之免言因免冠而為之也小斂之日喪事方始乃以二者別親疎而復以經帶之差繼之曲禮曰生與來日其此之謂乎于房兼髻髮者言也必于房者宜與髻者異處也免不言袒可知

婦人髻于室

注始死婦人將斬衰者去笄而纁將齊衰者骨笄而纁今言髻者亦去笄而纁而紒也

齊衰以上至笄猶髻髻之異於髻髮者既去纁而以髮為大紒如今婦人露紒其象也其用麻布亦如著慘頭



然疏知將斬衰去笄而纓者喪服小記云男子冠而婦人笄冠笄相對男子既去冠而著笄纓則婦人亦去笄而纓可知知將齊衰骨笄而纓者上引男子始死素冠則知婦人骨笄而纓也亦去笄纓而紒者謂至小斂節男子去笄纓而髻髮則此將斬衰婦人亦去笄纓而麻髻齊衰婦人去骨笄與纓而布髻矣鄭所云紒即髻也喪服注亦云髻露紒也齊衰以上至笄猶髻者謂從小斂著未成服之髻至成服之笄猶髻不改至大斂殯後乃著成服之髻代之也古者男子婦人吉時皆有笄纓喪至小斂男子去笄纓著髻髮婦人去纓著髻髮形先以髮為大紒紒上斬衰婦人以麻齊衰婦人以布其著之如男子髻髮與免故云其用麻布亦如著慘頭然既髻髮與髻皆如著慘頭而異為名者以男子陽外物為名而謂之髻髮婦人陰內物為稱而謂之髻也

教繼公曰曾子問言婦為舅姑始死之服布深衣縗總則吉笄而纓自若矣是乃將齊衰者也以始死男

子之服準之則此時婦人將斬衰而下者之服皆當  
如此齊衰者之為也髻者去笄總與纓而露紒也至  
是而當髻者乃髻其不當髻者但去笄總耳當髻者  
妻也妾也女子子與婦也非是雖三年者猶不髻此  
時當髻者皆在室故  
於焉為之猶便也

喪大記卒斂主人袒括髮以麻婦人髻

檀弓袒括髮變也去飾去美也袒括髮去飾之甚也有

所袒有所襲哀之節也

疏言袒衣括髮者是孝子形貌之變也去其尋常吉時服飾者

是去其華美也孝子去飾雖有多塗袒括髮者就去飾之中最為甚也孝子悲哀理應常袒何以有所袒有所襲表明哀之限節哀甚則袒哀輕則襲也

喪服小記斬衰括髮以麻為母括髮以麻免而以布注

服輕至免可以布代麻也為母又哭而免疏括髮者為父未成服之前所服也親始死子布深衣去冠而猶有筭縱徒跣扱上衽至將小斂去筭縱著素冠視斂斂訖扱冠而括髮為母初喪至小斂後括髮與父禮同故亦云括髮以麻也免而以布者此謂為母與父異者也亦自小斂後括髮至尸出堂子拜賓之時猶與為父不異拜賓後子往即堂下之位時則異也為父此時猶括髮而踊襲經帶以至大斂而成服若母則不復括髮乃著布免踊而襲經帶以至成服故云免而以布也注云又哭是小斂拜賓竟後即堂下位哭踊時也士喪禮云卒小斂主人髻髮袒此是初括髮哭踊之時也又云男子奉尸俛于堂主人降自西階東即位主人拜賓即位踊藥經于序東復位此是又哭之節若為父於此時猶括髮為母於此時以免代括髮故云為母又哭而免

呂大臨曰免以布為卷幘以約四垂短髮而露其髻於冠禮謂之闕項冠者必先著此闕項而後加冠故古者有罪免冠而闕項存因謂之免音免以其與冕弁之冕其音相亂故改音問

朱子曰括髮是束髮為髻儀禮注疏以男子括髮與免及婦人髻皆云如著幘頭然所謂幘頭即如今之掠頭編子自項而前交於額上却繞髻也

檀弓叔孫武叔之母死既小斂舉者出尸出戶袒且投

其冠括髮子游曰知禮

注尸出戶乃變服失哀節冠素委貌疏案士喪禮卒斂徹帷

主人馮尸踊無算括髮袒下云士舉男女奉尸僕于堂喪大記亦云卒小斂主人袒說髻括髮以麻下云奉尸

僂于堂是括髮在小斂之後奉尸僂于堂之前主人為欲奉尸故袒而括髮今武叔於奉尸僂堂之後乃投冠括髮故鄭云失哀節子游習禮見武叔失禮反謂之知禮蓋嗤之也

陳祥道曰問喪曰親始死難斯徒跣扱上衽檀弓曰始死羔裘玄冠者易之而已則始死有易冠無去冠者有易裘無袒衣矣儀禮小斂之節主人髻髮袒婦人髻于室問喪曰三日而斂袒而踊之檀弓曰主人既小斂袒括髮又曰袒括髮變也袒括髮去飾之甚也又曰叔孫武叔之母死既小斂舉者出尸出戶袒且投其冠子游曰知禮喪大記曰小斂主人袒說髻括髮以麻則小斂投冠脫髻髻髮而袒矣蓋人子之於始喪其幸生之心未已故未忍去飾焉及小斂則已矣然後髻髮而袒叔孫武叔既小斂舉者出戶袒而投其冠子游嗤之則投冠髻髮宜在未舉出戶之前歟曾子問曰女改服布深衣以趨喪鄭氏曰婦人

始喪未成服之服然則男子始喪蓋亦用白布深衣也難斯之喪不可以考鄭氏改難斯為苧纈將齊衰者素冠婦人將斬衰者去苧而纈將齊衰者骨苧而纈孔穎達之徒遂謂始死去冠而有苧纈將小斂則去苧纈者素冠視斂其說無據喪服小記曰斬衰括髮以麻為母括髮以麻免而以布則小斂奉尸出堂主人拜賓之時為母括髮以麻與父同也尸出堂訖降自西階即位復位之時為母不括髮而免與父異也喪大記曰君大夫之喪子弁經雜記曰小斂環經君大夫士一也則大夫以上素弁士素委貌皆加環經也孔穎達曰斬衰男子括髮齊衰男子免皆斂殯之時爾非斂殯則大夫以上加素弁士加素冠皆於括髮之上天子七日成服諸侯五日成服大夫士三日成服於理或然

方慤曰蓋小斂而後袒括髮則得其序矣出戶而後袒括髮則非其所也子游曰知禮所以甚言不知禮

也

王廷相喪服說儀禮小斂主人括髮袒衆主人免于房婦人髻于室括髮免髻之制何如曰斬衰男子去冠纓露紒以麻繩白項後交於額前却繞於髻曰括髮女子去笄纓露紒亦以麻繩白項後交於額前却繞於髻曰髻齊衰以下男女既去冠笄首不可無喪飾也故男子以布廣寸亦白項後交於額前却繞於髻而為免女子以布為髻如之曰廣寸不亦太狹乎曰此鄭氏之臆度也今以布一幅摺之而裹於首自前向後而復繞於髻亦可也然則禿者不免何謂也曰免之制繞於髻而頂無飾禿者則露其頂矣故不免不免則不括髮可推矣然則三者不近於相類乎曰括髮免髻皆髮居內而以麻與布表之其制一也在男女則異其名爾男主外故以外物為稱曰括髮曰免若曰自其麻與布言之也女主內故以內物為

稱曰髻若曰自其髻言之也然究其制則一也曰麻  
髮相半合結非乎曰此杜預之論也後世被髮之誤  
自此始也  
非古也

萬斯同曰括髮免髻之制注疏謂皆以麻自項而前  
交於額却繞於髻惟免用布為異是三物而一制也  
愚嘗竊有疑焉括髮之式自注疏而外諸家從無別  
解愚謂玩此二字之義則必其制足以括盡其髮而  
無餘也若止用麻一條果足以括盡其髮乎蓋古者  
有纚以韜髮纚用繒為之廣幅長六尺親始死冠去  
而纚猶存至小斂并纚去之而易以括髮其製必與  
纚相似蓋纚用繒而括髮用麻布此時不可以服繒  
故易之以麻布也不然括髮既用麻繩矣又以麻繩  
為經而加於括髮之上豈人之首所能容乎此括髮  
之可疑者一也免之式鄭氏固謂未聞又引舊說以  
為如冠狀夫曰如冠狀則非以一寸之布自項而繞



於額矣得毋自解而自背之乎善乎呂與叔之言曰  
免以布為卷幘以約四垂短髮而露其髻於冠禮謂  
之闕項冠者必先著此闕項而後加冠故古者有罪  
免冠而闕項存因謂之免是說也不勝於布廣一寸  
之說乎此免之可疑者二也髻之式鄭司農謂麻與  
髮相半結之馬季長謂屈布為巾高四寸惟鄭氏謂  
如慘頭爾昔夫子誨兄子以髻戒以毋縱縱毋扈扈  
釋者謂縱縱大高也扈扈大廣也儻如注疏亦以麻  
自項而交於額則本無高廣之形何必戒之以縱縱  
扈扈乎鄭司農之說杜元凱用之雖若勝於康成終  
不若馬氏高四寸之說與孔子之言有合也此髻之  
可疑者三也凡此三說非敢故違乎注疏但以昔賢  
原有別解何必鄭氏之是而他說之非也愚故聊抒  
臆見以質正於知禮者焉余既為此說或者謂經  
言括髮以麻而子謂用麻布則與免而以布何別乎  
不知括髮以麻者蓋未成之布故謂之麻免而以布

者乃已成之布故謂之布也若果如注疏之說自項而前交於額上乎則束髮不能固將交於額下乎則於髮不能括無一而可也故愚以為其制必當如纚也

乾學案人子始遭父喪鄭注謂將斬衰者笄纚蓋去冠而但存笄纚也陳用之非之謂始死有易冠無去冠而教繼公用其說謂當易之以素冠若是則鄭氏之說非乎愚以為親始死徒跣扱衽無容哀之至也豈有下則徒跣扱衽而上仍著冠者乎夫冠所以為飾此

何時也而尚存其飾也孝子之心固謂遭禍之深以罪人自處也儻猶然加冠以為飾是視親死無異於平日矣豈人情之所忍哉此鄭氏笄纓之說誠有所據而不可非也又案括髮也免也髻也本各為一物不宜相混今因其並用於一時不可一一分析故總敘於此而其可分者仍分敘之如左

免

問喪或問曰冠者不肉袒何也曰冠至尊也不居肉袒

之體也故為之免以代之也

注言身無飾者不敢冠冠為褻尊服肉袒則著免免

狀如冠而廣一寸

然則禿者不免偃者不袒跛者不踊非不悲

也身有錮疾不可以備禮也故曰喪禮唯哀為主矣女

子哭泣悲哀擊胃傷心男子哭泣悲哀稽顙觸地無容

哀之至也

注將踊先袒將袒先免此三疾俱不踊不袒不免顧其所以否者各為一爾擊胃傷心稽

顙觸地不踊者若此而可

陳澧曰免而袒袒而踊先後之次也有一疾則廢一禮女子不踊則惟擊胃男子不踊則惟稽顙觸地皆

可以為哀之至也

方慤曰露肉體而袒衣故謂之肉袒免雖在首而非冠以之代冠禿則頂無飾故不免免則頂露矣偃則背不直故不袒袒則形褻矣跛則足不正故不踊踊則足勞矣

### 檀弓公儀仲子之喪檀弓免焉

陸佃曰免以布廣一寸從項中而前交於額上又却向後繞於髻

方慤曰免之為服施於五世之親而朋友死於他邦者亦服之

### 喪服小記總小功虞卒哭則免

注棺槨已藏嫌恩輕可以不免也言則免者則

既殯先啓之間雖有事不免疏言遭總小功之喪棺槨在時則當著免今至虞卒哭之時棺槨雖藏已久亦

著免也虞卒哭則免明未虞之前則不免也虞前有葬  
莫是喪之大事棺柩既啓著免可知嫌虞與卒哭棺柩  
既掩不復著免故特  
言虞卒哭以明之也

既葬而不報虞則雖主人皆冠及虞則皆免

注有故不得疾虞雖

主人皆冠不可以無飾也皆免自主人至總麻疏前  
云赴葬者赴虞於疾莫者矣虞今依時而葬不依時而  
虞主人以下則皆  
冠不可以無飾也

為兄弟既除喪已及其葬也反服其服報虞卒哭則免

如不報虞則除之

注小功以下

陳澧曰此言為兄弟  
除服及當免之節

遠葬者比反哭者皆冠及郊而后免反哭

注墓在四郊之外疏葬

在遠處歸途不可無飾故臨欲反哭之時皆著冠及至近郊而後去冠著免反哭于廟

君弔雖不當免時也主人必免不散麻雖異國之君免

也親者皆免

注不散麻者自若絞垂為人君變貶於大斂之前既啓之後也親者大功以上也異

國之君免或為弔疏凡大斂之前著免大功以上散麻大斂以後著冠不散麻糾其垂也至將葬啓殯之後已葬之前亦散麻若君弔雖不當免時必為之著免不散麻帶貶於大斂之前及既啓之後也雖他國君來主人亦為之著免大功以上親者皆從主人而免敬異國君也

主人未除喪有兄弟自他國至則主人不免而為主

注親

質不崇敬也 疏免必有時 葬後唯君來弔為之免 崇敬欲新其事也 若五屬之親非時而奔則主人不須為之免 嫌親始奔亦應為免 如君故明之也

雜記非從柩與反哭無免於塋

注言喪服出入非此二事皆冠也免所以代冠

人於道路不可以無飾 塋道路疏從柩謂孝子送葬從柩去時也反哭謂葬竟孝子還時也道路不可無飾故孝子唯從柩反哭時於道得免而行非此二事則不得免於道路也

玉藻小功不說笏當事免則說之

注免悲哀哭踊之時不在於記事也小功

輕不當事可以搢笏也

左傳哀公二年六月乙酉晉趙鞅納衛太子于戚宵迷



陽虎曰右河而南必至焉使大子絕

注絕者始發喪之服疏士喪禮既

小斂主人括髮袒衆主人免于房鄭玄云括髮者去笄纚而紒也衆主人免者齊衰將袒以免代冠冠服之尤尊不以袒也又奔喪之禮至於家入門哭盡哀括髮袒自齊衰以下入門哭盡哀免麻于序東如彼禮文則主人當括髮齊衰以下乃免此大子絕者禮不至喪所不括髮故以絕代之爾靈公以四月卒今以六月而大子絕故云絕始發喪之服也遠道不臨喪者不得括髮故始發喪服絕也八人衰經偽自衛

逆者

注欲為衛人逆故衰經成服

告於門哭而入遂居之

陳祥道禮書儀禮小斂主人括髮袒衆主人免于房喪服小記曰為母括髮以麻免而以布又曰男子免而婦人髻喪大記曰母之喪即位而免奔喪曰奔母喪一括髮其餘以免終事小記又曰總小功虞卒哭

則免既葬而不報虞則雖主人皆冠及虞則皆免為兄弟既除喪已及其葬也反服其服報虞卒哭則免如不報虞則除之遠葬者反哭者皆冠及郊而後免反哭君弔雖不當免時也主人必免不散麻雖異國之君免也親者皆免又曰主人未除喪有兄弟自他國至則主人不免而為主然則袒免非喪服之常有時用之而已免於括髮為輕故為父括髮為母免於冠飾為重故總小功之虞卒哭遠葬者之及郊反哭主人之於君弔必免也

# 楊復髻髮免髻圖髻髮

士喪禮云主人髻髮袒注云始死將斬衰者雖斯今至小斂變

又將改初喪服也括髮者去笄纚而紒用麻為之狀如今之著慘頭矣自項中而前交於額上却繞紒也今案喪服小記云斬衰括髮以麻為母括髮以麻免而以布疏云為母初喪至小斂後括髮與父禮同至尸出堂子

拜賓事之時猶與為父不異唯為父則括髮以至大斂而成服若母喪則襲經帶乃奠則已著布免矣此為母與父異者也

**免**

士喪禮云衆主人免注云始死將齊衰者素冠今至

廣一寸用布為之狀如今之著慘頭矣亦自項中而前交於額上却繞紒也案此經文唯言衆主人而賈氏士喪禮疏云齊衰以下至總麻皆免也其所用布之升數未詳

**髻**

士喪禮云婦人髻于室注云始死將斬衰婦人去笄而纚將齊衰婦人骨笄而纚今至小斂盡去笄纚而

露紒也髻之異於括髮者既去纚而以髮為大紒如今婦人露紒其象也其用麻布亦如著慘頭者疏云將斬衰婦人去笄纚而麻髻將齊衰婦人去骨笄與纚而布髻也其大功以下之髻案賈氏疏則自齊衰以下至

總皆布髮

右括髮免髮乃小斂至大斂未成服之制又有變禮括髮免髮者奔喪是也有啓殯見棺柩變同小斂之時者既夕禮大夫髮散帶垂是也大要不出此三節而免之用為尤廣蓋喪禮未成服以前莫重於袒括髮檀弓曰袒括髮去飾之甚也括髮以麻免以布又曰免不冠者之所服則免之禮稍殺於袒括髮也是故小斂為父括髮至於成服為母則即位之後不括髮而為免小斂有括髮有免至啓殯則雖斬衰亦免而無括髮以至卒哭不惟此也自斬至總皆有免五世無服者亦袒免童子當室免朋友在他邦亦袒免君弔雖不當免時必免是免之用為尤廣也故今析括髮免髮為三條而逐條開其所用之節於下

括髮之節

小斂主人括髮袒士喪禮大斂注云不言髮免括髮者小斂以來自若矣奔喪括髮

詳見奔喪  
變服圖

免之節

為父小斂馮尸衆主人  
而免 啓殯至卒哭免

為母小斂主人即位  
詳見啓奠虞卒哭變

服圖

喪服小記曰諸侯弔雖已葬主人必免疏云凡

五服自大功以上為重重服為免之節自始死至葬卒

哭後乃不服免也小功以下為輕輕服為免之節自始

死至殯殯後不服免至葬啓殯之後而免以至卒哭如

始死若人君來弔雖非服免時必為免以尊重人君故

也又曰君弔雖不當免也主人必免不散麻雖異國之

君免也親者皆免已上君弔免奔喪免詳見奔

喪變服圖童子當室免此本不當免而免詳見奔

喪免已上五服外袒免

袒免已上五服外袒免

髻之節

小斂髻  
哭變服圖

啓殯髻  
奔喪髻

詳見啓奠反哭虞卒  
詳見奔喪變服圖

司馬公書儀曰括髮先用麻繩撮髻又以布為頭帶齊衰以下皆免用布或縫絹廣寸婦人髻亦紉麻為繩齊衰以下亦用布絹皆如慘頭之制自項向前交於額上却繞髻如著慘頭也先師朱文公曰儀禮注疏以男子括髮與免及婦人髻皆如著慘頭然慘頭如今之掠頭編子自項而前交於額上却繞髻也免或讀如字謂去冠

程大昌演繁露禮有袒免鄭氏曰免音問以布廣一寸從項中而前交於額上又却向後繞於髻也子疑不然記曰四世而緦服之窮也五世袒免殺同姓也服之旁殺而至於緦僅為三月則自此之外不更有服矣然而由四殺五不可頓如路人故屬及五世而族人喪則脫露半袖見其內服是之謂袒解除吉冠是之謂免免之為言正是免冠之免不應別立一冠名之為免而讀之如問也曲禮曰冠毋免勞毋袒

免且袒皆變易其常故侍君子者以為不恭亦無服者之屬用以致哀示與路人異也經於總有三月而袒免無期日也既無服又無期日第行之始死之時其斯以為戚矣歷考禮經本文止言袒免更無一語記其如何為袒如何為免則是小功以上衰經冠杖實有其制而袒免則原無冠服故亦莫得而記也周禮垂衰冠之式于路門謂總小功以上亦無袒免體式也使誠有其制如鄭氏所言則亦不成其為冠也況袒既不別為之衰又對免而言知當未斂之時第使之袒衣免冠者事情之稱也古今言以布統項及髻而謂之為免者惟鄭氏一人自漢以後并免而數以為冠名則皆師述鄭氏也杜佑博識古事而特致疑於此雖其斂載喪制即免加絲借古冕之統著以為統若用鄭矣而特自出其見於下曰統制未聞惟鄭氏云云則佑固不以為安矣案禮凡因事及免必與冠對喪服小記曰男子冠而婦人笄男子免而婦

人髮又曲禮冠無免則凡免皆與冠對免之為免當  
 正讀為免其禮已明矣喪而免冠不惟五世無服用  
 之雖重如斬衰當其未斂未及成服亦當用之蓋喪  
 之始未辨成服姑仍常時衣冠在衣則袒在冠則免  
 以為變常之始故經記重喪曰袒括髮變也愠哀之  
 變也去飾去美也袒括髮去飾之甚也賈公彥之釋  
 袒免首尾遵本鄭氏惟於此特循正禮而為之言曰  
 冠尊不居肉袒上必先免故凡哭哀則踊踊必先袒  
 袒必先免是袒且免皆因哀變常而未及為服者之  
 所為也斬衰重矣故免冠而肉袒免冠且肉袒矣而  
 又被髮不紒則以麻約之較之五世袒免則此為已  
 重若其袒衣免冠以示變常則斬衰袒免其意同也  
 且免之為免不止始喪然也喪服小記曰既葬而不  
 報虞則雖主人皆冠及虞則皆免又曰遠葬者比反  
 哭者皆冠及郊而後免又曰君弔雖不當免時也主  
 人亦免凡此三節皆以冠對免而免則皆取其進而



及於重也。葬而誠，虞也。遠葬而及郊，近墓也。已過免時而君始臨弔也，則皆以免冠為禮。取始死之節，以重為之也。葬不報虞，遠葬而未及墓，若過時而有弔者，自非其君，則皆仍所喪之冠而不為之免處之。以喪禮之常也。從是推之，知免冠之為始死之節也。喪服小記又曰：斬衰括髮以麻，為母括髮以麻，免而以布。蓋父母皆當以麻括髮，而古禮母皆降父，故減麻用布，亦殺於父也。此之謂免，蓋應用而許其不用。故特言免以明之。若如鄭言以免為免，則居母喪者既括髮以麻，而以布為免，遂當以免而加諸齊衰之上。則是降斬而齊遽著五世以外，輕殺無服之冠，豈其理乎？然以免為冠，萬世宗信。鄭氏子獨不以為安，故著此以待博而。

不惑者折衷之。

汪琬曰：宋儒程子泰之嘗辨袒免謂免如字不當如鄭氏音問。予始愛其文，久而考之禮經，則程子所辨

未合也程子曰不應別立一冠名之為免予則曰布廣一寸從項交額而却繞於紒是固不成其為冠也鄭氏亦未嘗以冠名之也程子曰解除吉冠之謂免如免冠之免于則曰此非禮經意也禮禿者不免謂其無紒可繞故不免也又或問曰免者以何為也曰不冠者之所服也洵如經言則不止於不冠而已如之何借免冠以為釋也程子曰衰經冠裳俱有其制而袒免則元無冠服故經莫得而記予則曰經文有之矣程子未之詳也禮奔喪者自齊衰以下入門左中庭北面哭盡哀免麻于序東是免用麻也斬衰括髮以麻為毋括髮以麻免而以布是免用布也布與麻者免之制也其可謂之無其制與程子曰禮男子冠而婦人笄男子免而婦人髻是冠與免對也故得以免冠為免于則曰非也冠與笄對免與髻對者也髻不止於除笄而免獨止於免冠乎左傳韓之戰秦穆公獲晉侯穆姬登臺履薪使以免服衰經逆則免

之有服審矣程子又釋喪小記曰父母皆應以麻括髮而古禮母皆降父故減麻用布而特言免以明之予則曰此又非也經文上言括髮而下言免則免與括髮不同不可以合釋之也有免而括髮者焉母喪是也有免而不括髮者焉屬及五世之喪是先儒之立言也雖不能無淳駁而其音釋必有所師承未可遽以為疑也

### 髻 笄 總

周禮夏官大僕縣喪首服之灋于宮門

注首服之灋謂免髻笄總廣狹

長短之數縣其書于宮門示四方

天官追師喪紀共笄經亦如之

喪服小記齊衰惡筭以終喪

注筭所以卷髮婦人質於喪所以自卷持者有除無

變

男子冠而婦人筭男子免而婦人髻其義為男子則免

為婦人則髻

別男女也質至服竟而除故云惡筭以終喪

疏惡筭者榛木為筭也婦人

始死

男去冠女去筭成服為父男則六升布為冠女則箭篠為筭為母男則七升布為冠女則榛木為筭故云男子冠而婦人筭也遭齊衰之喪首飾亦別當襲斂之節男子著免婦人著髻故云男子免而婦人髻髻形有種種有麻有布有露紒其形有異同謂之髻也其麻髻之形與括髮如一其著之以對男子括髮時也前云斬衰括髮以麻則婦人於時髻亦用麻男子括髮先去冠紒用麻則婦人髻亦去筭紒用麻以此知有麻髻以對男括

髮時也又知有布髮者案此男子免對婦人髮男免既用布則婦人髮不容用麻也是知男子為母免時則婦人布髮也又若成服後男或對賓必踊免則婦人理自布髮對之知有露紵髮者喪服傳云布總箭筈髮衰三年三年之內男不恒免則婦人不恒用布髮故知恒露紵也又齊衰期髮無麻布何以知然檀弓言爾母縱縱爾爾毋扈扈爾但戒其高大不云有麻布別物是知露紵悉名髮也又案奔喪云婦人奔喪束髮鄭云謂姑姊妹女子子也去纁大紵曰髮唯云去纁大紵不言布麻當知期以下無麻布也然露紵恒居之髮則有筓何以知之案筓以對冠男在喪恒冠婦則恒筓也喪服惡筓有首以髮是也此三髮之殊是皇氏之說今考校以為止有二髮一是斬衰麻髮二是齊衰布髮皆名露紵必知然者以喪服女子子在室為父箭筈髮衰是斬衰之髮用麻鄭注以為露紵明齊衰髮用布亦謂之露紵髮也其義為男子則免為婦人則髮者以其義止於別男

女而已非  
別有義也

方慤曰男子所以冒首者謂之冠婦人所以貫髮者謂之笄此特言其吉而已及凶而變焉男子則去冠而免婦人則去笄而髻也蓋有冠則首服去冠則免故去冠以麻繞之謂之免有笄則髮立去笄則髮故去笄以麻繞之謂之髻若夫男子成服則亦有冠焉所謂厭冠是也婦人成服則亦有笄焉所謂惡笄是也然則喪之或免或髻者豈有他哉特以辨男女之義而已

箭筭終喪三年

注亦於喪所以自卷持者有除無變疏前云惡笄終喪是女子為母也此謂

女子在室  
為父也

陸佃曰箭筭重矣據齊衰惡笄以終喪箭筭猶直杖惡笄猶削杖

檀弓南宮縉之妻之姑之喪

注南宮縉孟僖子之子南宮閱也字子容其妻孔子

兄夫子誨之髻曰爾毋從從爾爾母扈扈爾

注誨教爾女也從從

謂大高扈扈謂大廣爾語助

蓋榛以為笄長尺而總八寸

注總束髮垂為飾齊

衰之總八寸疏言期之髻稍輕自有常法毋得從從而大高毋得扈扈而大廣又教以笄總之法蓋用榛木為笄其長尺而束髮垂餘之總八寸喪服傳云總長六寸謂斬衰也此齊衰長八寸以二寸為差也以下亦當然喪服箭笄長一尺吉笄長尺二寸此榛笄亦長尺是斬衰齊衰笄同一尺降於吉笄二寸也

魯婦人之髻而弔也自敗於臺鮒始也

注魯襄四年秋也春秋傳作狐

鮒時家家有喪髻而相弔去纈而紒曰髻禮婦人弔服大夫之妻錫衰士之妻則疑衰與皆吉笄無首素總

方慤曰髻所以施於喪非所以施於弔弔則各以其  
衰而已臺鮒之敗以家各有喪故髻而弔然魯婦人  
因之而弗改則非矣

左傳襄公四年冬十月邾人莒人伐鄆臧紇救鄆侵邾

敗于狐鮒

注臧紇武仲也鄆屬魯故救之

國人逆喪者皆髻魯於是乎

始髻

注髻麻髮合結也遭喪者多故不能備凶服髻而  
已疏髻之形制禮無明文先世儒者各以意說

鄭衆以為枲麻與髮相半結之馬融以為屈布為巾高  
四寸著於顙上鄭玄以為去纁而紒枲檀弓言爾母從  
從爾爾母扈扈爾鄭云從從謂大高扈扈謂大廣若布  
高四寸則有定制何當慮其從從扈扈而謂之哉如鄭  
去纁而空露其紒則髮上本無服矣喪服女子在室為  
父髻衰三年空露紒髮安得與衰共文而謂之髻衰也



魯人逆喪皆髻豈直露紒迎喪哉凶服以麻表髻  
字從髟是髮之服也杜以鄭衆為長故用其說

陳祥道禮書喪筭有三箭筭也櫛筭也折首筭也箭  
筭櫛筭長尺折首筭長尺二寸箭筭為重櫛筭次之  
折首筭為輕斬衰筭以箭齊衰筭以櫛女子子在室  
為父箭筭則斬衰之筭以箭矣女子子適人者為其  
父母婦人為舅姑惡筭則齊衰以櫛矣箭筭惡不足  
以言之櫛筭言惡以其木之無文故也古者櫛以櫛  
櫛白理而無文則櫛筭用櫛無櫛則櫛可矣故檀弓  
曰蓋榛以為筭也儀禮曰卒哭子折筭首折筭首者  
折吉筭之首也言子不言婦終之也蓋惡筭有首吉  
筭折首吉筭則婦而不子折其首別子而不婦以其  
不可全於子故吉筭以其不可全於婦故折其首儀  
禮曰女子子在室為父箭筭三年小記曰齊衰惡筭  
以終喪則惡筭不終喪而吉筭折其首者特子之適  
人者而已鄭氏曰筭有首者若今時刻鏤摘頭矣觀

古笄字則笄之形  
制可知 右論笄

又曰鄭氏釋喪大記曰去纓大紒曰髻釋喪服曰髻  
露紒也猶男子之括髮斬衰括髮以麻則髻亦用麻  
以麻者自項而前交於額上却繞紒如著慘頭然蓋  
其所傳然也其狀則毋從從爾不至於縱而高也毋  
扈扈爾不至於卑而大也爾雅曰卑而大扈則從從  
為縱而高可知也小斂主人括髮袒衆主人免于房  
婦人髻于室奔喪男子束括髮婦人束髻又小記曰  
男子免于婦人髻則婦人之髻猶男子之括髮故也  
故括髮以麻則髻以麻矣免而以布則髻以布矣髻  
以麻則斬衰也髻以布則齊衰也小斂之髻不言笄  
則未成服之髻無笄矣女子適人者為其父母婦  
為舅姑惡笄有首以髻孔子言髻而繼之以榛笄則  
成服之髻有笄矣又儀禮言髻衰三年小記言齊衰  
惡笄以終喪則齊衰斬衰之髻皆終喪矣然則啓殯

之髻雖在成服之後蓋亦無笄以對男子之袒而免故也男子之袒免及於五世婦人之髻不及於大功者以髻不得對免而又上同於括髮故也禿者不髻以疾也弔者不髻以疎也皇氏以麻髻布髻露紒為三髻然則髻雖麻與布之不

同其為露紒一也

右論髻

又曰內則子事父母難初鳴咸盥漱櫛縱髮總角士冠禮冠綏纓男女未冠笄者盥漱櫛縱髮總角士冠禮緇纓廣終幅長六尺贊者坐櫛設纓賓坐正纓特牲禮主婦纓笄宵衣鄭氏曰纓今情梁也纓一幅長六尺足以韜髮而結之蓋櫛以理髮而後纓以纓為紒然後笄古之言纓笄者未有先笄而後纓也門喪曰親始死難斯徒跣蓋難斯云者哭聲然也鄭氏改難斯為笄纓恐不然也纓亦作縱

右論纓

又曰內則曰櫛縱髮總角則縱韜髮也總束髮也玉藻曰童子錦束髮喪服女子子在室為父布總六寸女


子子適人者為其父母婦為舅姑妻為女君君之長  
子布總檀弓曰南宮縚之妻為姑總八寸士喪禮髻  
用組乃笄然則總或以錦或以布或以組吉凶之禮  
異也謂之總以既束其本又總其末也孔穎達曰期  
總八寸大功總亦八寸總麻小功同一尺  
吉總當尺二寸此不可考  
右論布總

纒  
緇色

廣終幅長六尺



筭



鄭氏曰筭卷髮  
者箭筭長尺吉  
筭長尺二寸



楊復婦人首飾圖

自斬至總成服皆布總

束髮謂之總既束其本又總其末案始死婦人皆縞總今此

成服則用布為之

其布之升數象男子冠數具見前條其長則斬衰總長六寸注六寸謂出紼後所垂

為飾者也

期總八寸大功總亦八寸小功總麻同

終喪

婦人相弔者素總所謂素者布歟縞歟未詳

斬衰箭筓

箭篠竹也以前篠為筓也婦人去筓至男子括髮著麻髻之時猶不筓

案始死將斬衰

今成服始用箭筓

箭筓長尺

婦人箭筓終喪婦人質有除無變也惟妾為君之長子雖服齊衰不著箭

筓見下

惡筓條

齊衰惡筭有首

惡筭者櫛筭也。名也。或曰櫛筭也。惡者木理麤惡非木也。以櫛木為之也。

有首者若漢之刻鏤摘頭矣。案檀弓櫛以爲筭長尺者婦爲姑也。然則凡惡筭皆長尺歟。案儀禮傳女子適人者爲其父母。婦爲舅姑。惡筭有首及妻爲女君之長子亦惡筭有首。餘無明文。則齊衰輕期之筭未詳。婦人惡筭終喪。唯女子子既卒哭而歸夫家則折吉。筭之首以筭吉。筭者象骨爲之。吉時有首爲其太飾之。故折之。

大功以下筭

未詳。今案女子子既卒哭折吉。筭之首以筭。又婦人相弔者吉。筭無首。素總則此。

大功以下之筭。或者亦吉。筭無首而加以布總歟。

斬衰以下髻

髻之制。先儒所釋各不同。今條具在下。士喪服篇注云。髻露紒也。猶男子之括髮。



斬衰括髮以麻則髻亦用麻以麻者自項而前交於額上却繞紒如著慘頭焉賈氏疏曰髻有二種一是未成服之髻即是喪禮所云將斬衰者用麻將齊衰者用布是也二者成服之後露紒之髻是也又云有斬至總婦人皆露紒而髻喪服小記孔氏疏引皇氏之說言婦人之髻有三有麻有布有露紒孔疏雖引皇說在前又駁之曰今考校止有二髻一是斬衰麻髻二是齊衰布髻皆名露紒其將斬衰著於男子括髮之時則以麻為髻其將齊衰著於男子免時則以布為髻其葬之時婦人之髻則與未成服之時同其大功以下則無髻也今考三說互有得失更當考詳喪服四制云禿者不髻

魏書劉芳傳高祖宴羣臣於華林王肅語次云古者唯婦人有笄男子則無劉芳曰推禮經正文古者男子婦

人俱有笄肅曰喪服稱男子免而婦人髻男子冠而婦人笄如此則男子不應有笄若曰此專謂凶事也禮初遭喪男子免時則婦人髻男子冠時則婦人笄言俱以時變而男子婦人免髻冠笄之不同也又冠尊故奪其笄稱且互言也非謂男子無笄又禮內則稱子事父母雞初鳴櫛纚笄總以茲而言男子有笄明矣

開元禮斬衰婦人以六尺布為總

總束髮也

小祥練總大祥

縞總禪縞總齊衰大功小功總麻皆布總精粗如男子

之冠

書儀斬衰婦人用極麤生布為頭帶惡竹髮布蓋頭

齊衰婦人露髻以生白絹為頭帶蓋頭大功亦如之

家禮斬衰婦人用極麤生布為蓋頭不緝布頭帶竹釵

齊衰婦人蓋頭

制同斬但用布稍細緝邊

布總

竹釵

大功小

功總麻

制俱同上但布之精麤有異

楊復曰儀禮妻為夫妾為君女子子在室為父布總  
箭筈髻衰三年以家禮參考之儀禮小斂婦人髻于  
室以麻為髻家禮小斂婦人用麻繩撮髻為髻其制  
同儀禮婦人成服布總六寸謂出紼後所垂者六寸

箭筈長尺家禮婦人成服布頭帶竹釵所謂布頭  
帶即儀禮之布總也所謂竹釵即儀禮之箭筈也

### 丘濬家禮儀節補蓋頭

用稍細麻布為之比衣裙稍  
細者凡三幅長與身齊不緝

邊案事物紀原唐初宮人著翟羅全身障蔽永徽之  
後用幃帽又戴皂羅五尺今曰蓋頭凶服者亦以三

幅布為之案此則蓋頭之來也遠矣雖非布頭帶用  
古制是亦古禮婦人出而擁蔽其面之意

細布一條為之長八寸用以束髮根而垂其餘於後  
案此即所謂總也儀禮女子在室為父布總傳曰

總長六寸注謂六寸出髻外所垂之飾也曾子問鵠  
總注鵠白絹也長八寸今世俗婦女有服者用白布

束髻上謂之孝圍亦是此意但彼竹釵削竹為之長  
加於髻上而不束髮亦不垂其餘

即儀禮所謂箭筈也傳曰箭筈長  
尺今恐太長其長僅以約髮可也

呂柟曰婦人麻布大袖圓領長衫者何衰之變也禮婦人言衰不言裳衰之長可以掩裳秦人以長衫為背子故長衫者衰之變也麻布蓋頭者何布總之變也自有書儀以來未之有改也丘文莊曰唐累羅之變也家禮有布頭帶竹釵者何曰箭筈之變也吳不經乎既蓋頭吳經也故有腰經無首經白羅蓋頭宋王淮之議也

乾學案此條雖列女子子在室之後實連妻為夫妾為君女子子在室為文上言衰裳冠纓皆男子之服於婦人服制未詳故更著總髻髻及衰以明四婦人之服其經杖絞帶

管屨則男女並同也賈疏曰女子子總用布  
云者因傳文吉筭句所誤爾蓋傳之云吉筭  
因釋經文總六升長六寸箭筭長尺遂連總  
筭之文曰吉筭尺二寸傳者以附著吉筭尺  
寸此飾乃婦人已嫁之服固非經文所有亦  
非斬服中所有也賈遂以此條專屬之女子  
子不知未嫁之女其總筭髻衰與妻妾反在  
室之女並同觀上子為父諸侯為天子父為

長子臣為君為人後者同是斬衰冠纓則此  
條亦蒙上文三婦人而不專為女子子設明  
矣下女子子適人條不言吉筭記子折筭首  
不著尺寸以附見首章故不復詳大略皆可  
見云

讀禮通考卷三十二